


土岐文庫  
文庫17  
W117  
10





文庫 17  
W117  
10

杜工部編年詩史譜目

壬子 唐睿宗先天元年

公生於京兆之杜陵

癸丑 先天二年八月玄宗即位改元開元元年

乙卯 開元三年

公年四歲劒器行序云開元三年余尚童稚記於郾城

觀公孫氏舞劒器

戊午 開元六年

公年七歲壯遊詩云七齡思卽壯開口詠鳳凰又進鵬

江陽陳氏孟季藏書印



昭和六十年二月一日贈  
土岐善吉唐氏寄

010185191856



賦表云自七歲所綴詩律句四十載矣約有千餘篇

庚申 開元八年

公年九歲壯遊詩云九齡書大字有作成一囊

丙寅 開元十四年

公年十五壯遊詩云往昔十四五出遊翰墨場斯文崔

魏徒以我似班楊時省親兗州

望嶽登兗州城樓

丁卯

開元十五年春正月吐蕃入寇王君奭追擊至青海破之九月吐蕃陷瓜州盜殺君奭

戊辰

開元十六年秋八月金吾將軍杜賓客破吐蕃於祁連城

己巳

開元十七年春三月朔方節度使信安王禕攻吐蕃收石堡城

庚午

開元十八年夏六月以忠王浚領河北道行營元帥帥師討奚契丹

辛未

開元十九年春正月以詩書賜吐蕃

公年二十遊吳越

詩不可考

壬申

開元二十年春正月遣信安王禕將兵擊奚契丹大破之

癸酉

開元二十一年春正月遣大門藝討渤海不克

甲戌

開元二十二年帝幸東都以方士張果為銀青光祿大夫冬十二月幽州節度使張守珪斬奚契丹王屈烈及可突干

公年二十三自吳越歸東都赴鄉舉



乙亥 開元二十三年帝在東都

丙子 開元二十四年春正月突騎施寇北庭都護蓋嘉運擊破之三月敕禮部侍郎掌貢舉四月張守珪使討擊使安祿山討奚契丹敗績奏請斬之上不聽張九齡罷相

公年二十五下第

遊龍門奉先寺 鄭駙馬宴洞中 重題鄭氏東亭 夜宴左氏莊 房兵曹胡馬 畫鷹 送裴虬

送翰林張司馬南海勒碑 送人 從軍 白絲行 高都護驄馬行

丁丑 開元二十五年春正月置玄學博士二月河西節度使崔希逸襲吐蕃破之夏四月殺監察御史周子諒 史募丁壯充邊軍

公年二十六遊齊趙

戊寅 開元二十六年春正月以王璵為祠祭使

己卯 開元二十七年秋八月磧西節度使蓋嘉運擊突騎施擒其可汗

庚辰 開元二十八年冬十月吐蕃寇安戎城發關中兵救之

公年二十九竝在齊趙

贈李白 尋范十隱居 前出塞 題張氏隱居

劉法曹鄭瑕丘石門宴集 與任城許主簿遊南池 已上人茅齋 對

雨書懷走邀許主簿

辛巳 開元二十九年閏四月吐蕃入寇騎將臧希液擊破之秋七月伊洛及支川水溢河南北二十四郡水

二月吐蕃陷石堡城

公年三十回東都祭遠祖當陽君於首陽



壬午

天寶元年春正月大赦改元

癸未

天寶二年春正月安祿山入朝上寵待甚厚

甲申

天寶三年改年為載始祝九宮神李白入長安

公年三十三竝在東都夏五月公之祖母盧氏卒於陳

畱八月歸葬鄆師

龍門 過宋之問員外舊莊

臨邑舍弟書至苦雨

河溢寄作

假山植慈竹

李監宅二首

覆舟二首

乙酉

天寶四載春正月帝聞空中神語二月以朔方節度使王忠嗣兼河東節度使八月以楊氏太真為貴妃八月安祿山討奚契丹破之李白在朝

公年三十四在齊州作故德儀皇甫淑妃神道碑

寄元逸人

陪李北海宴歷下亭

同李太守登歷

下古城員外新亭

暫如臨邑至嵒山湖亭懷李員外

外 冬日

有懷李白

丙戌

天寶五載春正月以王忠嗣為河西隴右朔方河西節度使夏四月李適之罷相

公年三十五自齊趙歸長安

贈翰林張四學士

贈特進汝陽王

寄河南韋尹

丈人 飲中八仙歌

樂遊園歌

漢陂行 今夕

行

丁亥

天寶六載春正月殺北海太守李邕李適之自殺將軍董延光攻吐蕃石堡城不克十一月以哥舒翰為隴右節度使



公年三十六應詔退下留京師作天狗賦

贈韋左丞丈濟 贈鄭諫議 城西陂泛舟 送張  
二十參軍赴蜀呈楊五侍御 陪貴公子丈八溝攜  
妓納涼晚遇雨二首 贈陳二補闕 贈獻納起居  
田舍人澄 承沈八丈東美除膳部員外郎奉寄  
崔駙馬山亭宴集 貧交行  
兵車行 投簡成華兩縣諸子

戊子

天寶七載夏四月以高力士為驃騎大將軍五月賜  
安祿山鐵券以楊釗判度支事冬十月封貴妃姊三  
人為韓虢秦國夫人元皇  
帝降於朝元閣李白還山

公年三十七於是年冬往東都

醉歌行 贈比部蕭郎中十兄 奉贈韋左丞丈  
遣興二首 送韋書記赴安西 冬日洛城北謁  
元廟 遣  
興五首

己丑

天寶八載春二月帥羣臣觀左藏賜楊釗金紫夏五  
月停折衝府上下魚書自是精兵聚於西北武備盡  
弛哥舒翰攻吐蕃石  
堡拔之李白在東都

公年三十八在東都

庚寅

天寶九載夏五月賜安祿山爵東平郡王置廣文  
館於國子監賜楊釗各國忠冬十月安祿山入朝

公年三十九在東都誌萬年縣君京兆杜氏墓是年秋

自東都回長安進鵬賦

贈畢四曜 故武衛將軍挽詞三首 三韻  
三篇 戲為六絕 贈李白 重經昭陵

辛卯

天寶十載春正月壬辰朝享太清宮癸巳享於太廟  
甲午有事於南郊為安祿山起第親仁里李白在江  
東



公年四十在長安進三大禮賦玄宗奇之命待制集賢院召試文章為宰相陳希烈所忌試後止送隸有司參列選序時霖雨積旬有秋述一首

號國夫人 贈太常張卿垺 贈衛八處士 同諸公登慈恩寺塔 留贈崔于二學士 醉時歌 曲 江三章 送孔巢父謝病歸 春日懷李白 陪鄭廣文遊何將軍山林十首 杜位宅守歲 天寶十一載冬十一月李林甫卒以楊國忠為相安祿山入朝

壬辰 公年四十一在京師

示從孫濟 病後過王倚飲贈歌 陪李金吾花下飲 重過何氏五首 投贈哥舒開府翰 天寶十二載春楊國忠注選人于都堂欲收人望京兆尹鮮于仲通諷選人為國忠刻頌立於省門秋隴

右節度使哥舒翰擊吐蕃拔洪濟大漠門等城悉收九曲部落國忠奏以翰兼河西節度賜爵西平郡王冬十月帝如華清宮

公年四十二在京師

奉贈鮮于京兆 麗人行 送高三十五書記 戲簡鄭廣文兼呈蘇司業 夜聽許十一誦詩 夏日李公見訪 宴漢陂 九日曲江 贈田九判官 奉同郭給事湯東靈湫作

甲午 中大 飢

公年四十三在京師授河西尉不拜改右衛率府胄曹參軍進封西嶽賦十一月在奉先



沙苑行 送蔡希魯都尉還隴右寄高三十五書記

秋雨歎 苦雨寄隴西公 上韋左相 九日寄

岑參 官定後戲贈 橋陵詩 自京

赴奉先詠懷 天育驃騎歌 驄馬行

乙未

天寶十四載春二月安祿山請以蕃將代漢將從之  
哥舒翰入朝得疾遂留京師冬十一月帝如華清宮  
十一月安祿山反十二月封常清與賊戰敗績遂陷  
東京以哥舒翰為副元帥軍於潼關翰病不能治事

公年四十四在奉先

人日二首 九日楊奉先會崔明府 奉

先劉少府畫山水障歌 歎庭前甘菊花

丙申

天寶十五載春正月安祿山僭號稱大燕皇帝遣其  
子慶緒寇潼關哥舒翰擊却之夏四月郭子儀李光  
弼破史思明六月潼關破賊遂入長安帝幸蜀次馬  
嵬楊國忠及貴妃楊氏伏誅秋七月肅宗即位於靈  
武收元至德九月以廣平王傲為天下大元帥同羅  
反冬十月房琯及賊戰於陳陶斜敗績史思明攻陷

河北諸郡回紇兵入援永王璘  
反十二月吐蕃陷威武等軍

公年四十五於是年五月自奉先往白水依舅氏崔少

府八月又自白水攜家往鄜州及聞肅宗即位自鄜羸

服奔行在遂陷賊中

蘇端薛復筵醉歌 白水明府舅宅 白水縣崔少

府 三川觀水漲 悲陳陶 得舍弟消息二首

哀王孫 悲 青坂 對雪

丁酉

至德二載安慶緒弑其父祿山遂寇河南北諸州二  
月肅宗次鳳翔永王璘敗死李白流夜郎七月黃河  
清三十里八月吐蕃遣使來請討賊且修好上遣給  
事中南巨川往報聘九月廣平王傲郭子儀收復西  
京十月收復東京上往西京十二月明皇至自蜀赦  
天下功臣進階賜爵有差追贈死節之士制陷賊官



以六等定罪

公年四十六在賊中間至東都四月公脫賊中謁帝行在拜左拾遺會房瑄罷相上疏救瑄上怒詔三司推問宰相張鎬救之獲免時公家在鄜州八月奉詔自鳳翔還鄜州十月扈從還西

元日寄韋氏妹 春望 憶幼子 一百五日夜對月 月夜 遣興 哀江頭 大雲寺贊公房四首 雨過蘇端 喜晴 鄭駙馬池臺 行次昭陵 喜達行在所三首 送樊侍御赴漢中 述懷 得家書 送長孫侍御 送從弟亞赴河西 送韋評事 送郭中丞 送楊六判官 獨酌成詩 月 哭長孫侍御 奉贈嚴八閣老 畱別賈嚴二閣老 晚行口號 徒步歸行 玉華宮 九成宮 卷

村三首 北征 寄李白二十韻 彭衙行 喜聞官軍臨賊境 收京三首 潼關吏 留花門 塞

蘆子 瘦馬行 畫鵲行 送鄭十八虔貶台州司戶 獵日

戊戌 乾元元年春二月大赦改元復以載為年三月徙楚王俶為成王夏四月新主入太廟五月張鎬罷立成王俶為皇太子更名豫六月立太一壇史思明反秋七月初鑄大錢冊回紇英武可汗以寧國公主歸之八月命郭子儀等九節度討安慶緒以宦官魚朝恩為觀軍容使冬十月郭子儀等拔衛州遂圍鄴城李白赦回 九江

公年四十七是年春在諫省夏六月出為華州司功參軍赴華州作試進士策問為郭使君進滅寇圖狀冬晚離官以事之東都



和賈至早朝大明宮 晚出左掖 紫宸殿退朝口  
號 題省中壁 春宿左省 送賈閣老出汝州  
曲江陪鄭八丈南史飲 曲江二首 曲江對酒  
曲江值雨 晦日尋崔駙李封 送程錄事還鄉  
題松樹障子歌 陪鄭駙馬韋曲二首 奉贈王中  
允維 送許拾遺歸江寧 奉寄旻上人 憶弟二  
首 得舍弟消息 送李校書 偈側行 洗兵馬  
得舍弟消息 義鵲行 端午日賜衣 酬孟雲  
卿 移華州掾 題鄭縣亭子 望嶽 早秋苦熱  
去矣行 雨晴 初月 觀安西兵過赴關中  
九日藍田崔氏莊 崔氏東山草堂 寄高三十五  
簷事 遣興三首 至日遣興二首 劉顥宅宴醉  
歌 閔鄉姜少府設餽長歌 戲贈秦少府  
短歌 李鄴縣丈人胡馬行 戲呈楊員外  
乾元二年春旱三月鄴城師潰史思明殺安慶緒遂  
寇河南北諸州夏四月史思明僭號秋八月更鑄大  
錢冬十月李光弼與史  
思明戰於河陽大敗之

己亥 公年四十八春自東都回華州七月去官客秦州十月  
往同谷十二月入蜀

觀兵 不歸 所思 獨立 不見 新安吏 石  
壕吏 新婚別 垂老別 無家別 夏日歎 夏  
夜歎 立秋後題 赤谷西崦 昔遊 佳人 懷  
鄭司戶 遣興五首 秦州雜詩二十首 野望  
天末懷李白 天河 東樓 山寺 貽阮隱居  
從人覓小胡孫 阮隱居致雉 蕃劍 銅餅 寓  
目 卽事 歸燕 促織 螢火 蒹葭 苦竹  
日暮 夕烽 秋笛 擣衣 月夜憶弟 遣興  
夢李白二首 遣興三首 秦州見敕目 寄彭州  
高使君 寄岳州賈司馬 寄張山人 後出塞五  
首 示姪佐 佐還山後寄三首 宿贊公房 遣  
懷 廢畦 除架 西枝村二首 病馬 寄贊上  
人 太平寺泉眼 空囊 送李判官 送遠 別  
贊上人 兩當縣吳侍御宅 發秦州 赤谷 鐵



堂峽 鹽井 寒峽 法鏡寺 青陽峽 龍門鎮

石龕 積草嶺 泥功山 鳳凰臺 寓居同谷

縣作歌七首 萬丈潭 發同谷 木皮嶺 白沙

渡 水會渡 飛仙閣 五盤 龍門閣 石櫃閣

桔柏渡 劔門 鹿頭山

成都府 散愁二首 恨別

庚子

上元元年春三月李光弼破安太清於懷州夏四月  
破史思明於河陽五月以劉晏為戶部侍郎充度支  
鑄錢鹽鐵等使秋七月李輔國遷上皇於  
西內時裴冕為成都尹未幾李若幽代之

公年四十九卜居浣花溪間至青城

酬高使君 奉酬李都督 卜居 王司馬弟相訪

堂成 遊脩覺寺 後遊 賓至 狂夫 有客

蜀相 石笋行 漫興九首 題新津橋 雲山

為農 梅雨 田舍 江村 江漲 題韋偃畫

馬歌 戲題王宰山水圖歌 戲韋偃為雙松圖歌

赴青城 野望 丈人山 出郭 泛溪 贈閣

丘師兄 野老 一室 北鄰 南鄰 村夜 奉

簡高使君 寄楊五桂州譚 西郊 和裴迪 蕭

明府處覓桃栽 憑何少府覓橙木栽 憑

韋少府覓松樹子栽 又於韋處乞瓷盃

辛丑

上元二年以崔光遠代李若幽為成都尹三月史朝  
義弒其父思明遂寇河南北夏四月段子璋反於東  
川秋七月朔日食既大星皆見九月置道場於三殿  
制去尊號及年號以十一月為歲首月以斗建辰為  
名江淮大飢冬十月崔光遠卒以蜀州刺史高適攝  
成都建子月受朝如正旦儀貶劉晏以元載為度煮  
鹽鐵轉運使建丑月

以嚴武為成都尹

公年五十居草堂召補京兆功曹參軍不赴

早起 琴堂 漫成二首 客至 江畔尋花七絕

春水生二首 春夜喜雨 遣意二首 春水

江亭 徐步 寒食 石鏡 少年行二首 杜鵑

行 戲作花卿歌 高楠 寄杜位 送裴五赴東



川 送韓十四江東省觀 逢唐典劉王簿弟 和  
 裴迪登新津亭 敬簡王明府 重簡王明府 因  
 崔侍御寄高適 聞斛斯六官未歸 徐卿二子歌  
 贈花卿 百憂集行 石犀行 江漲 朝雨  
 晚晴 病柏 病橘 枯樛 所思 進艇  
 草堂即事 徐少尹見過 寄范員外吳侍御  
 請王侍御邀高使君 王竟攜酒高亦同過 奉寄  
 別馬巴州 陪李司馬觀造竹橋 觀作橋成 李  
 司馬橋了承高使君自成  
 都回 詣徐卿覓果子栽

壬寅

寶應元年建卯月以西京府為上都河南府為東都  
 鳳翔府為西都江陵府為南都太原府為北都建巳  
 月玄宗崩改元復以建寅月為正月肅宗崩代宗即  
 位敕以大小錢皆當一六月以劉晏為度支轉運鹽  
 鐵等使秋七月嚴武召還以高適代九月貶裴冕為  
 施州刺史回紇入援冬十月以雍王适為天下兵馬  
 元帥討史朝義大敗之取東京及  
 河陽賊將薛嵩張志忠以州降

公年五十一在成都上嚴武說早後送武還朝到綿州

未幾劔南西川兵馬使徐知道反公因入梓州冬復歸

成都迎家

奉待嚴大夫 江頭五首 野望 三絕句 畏人  
 可惜 落日 獨酌 廣州段功曹到 得廣州  
 張判官叔卿書 送段功曹歸廣州 魏侍御相別  
 從韋明府覓綿竹 贈別何邕 贈別鄭鍊 重  
 贈鄭鍊 嚴中丞見過 奉酬嚴公 遭田父泥飲  
 杜鵑行 野人送朱櫻 弊廬遣興 奉和嚴中  
 丞西城晚眺 建都 短歌行贈王郎 嚴公雨中  
 見寄奉答二絕 王錄事許修草堂貴不到 謝嚴  
 中丞乳酒 江水值水如海勢短述 戲贈友二首  
 水檻遣心 三首 屏跡二首 大麥行 絕句四  
 首 嚴公仲夏枉駕即事 少年行 嚴公聽宴  
 大雨 溪漲 寄高適 奉送嚴公入朝 送嚴公



到綿州 奉濟驛重送嚴公 送梓州李使君 苦

戰行 去秋行 觀打魚歌 又觀打魚 越王樓

歌 海棕行 姜楚公畫角鷹歌 宗武生日 光

祿坂行 悲秋 客夜 客亭 戲題寄上漢中王

三首 贈韋贊善別 九日登梓州城 九日寄嚴

大夫 題玄武禪師壁 翫月呈漢中王 嚴氏溪

放歌 相從行贈嚴別駕 述古二首 秋盡 野

望 冬到金華山觀 陳拾遺故宅 謁文公上方

奉贈李四丈 早發射洪縣 通泉驛南山水 過

郭代公故宅 觀薛少保書畫壁 通泉署壁薛少

保畫鶴 陪侍御宴 陪王侍

御登東山最高頂宴姚通泉

代宗廣德元年春正月史朝義自殺傳首京師其將

李懷仙以幽州降田承嗣以莫州降三月辛酉葬玄

宗庚午葬肅宗秋七月改元冬十月吐蕃陷京師帝

幸陝州郭子儀復京師十一月呂太一反廣州討平

之十二月車駕還京

吐蕃陷松維保三州

癸卯 公年五十二在梓州春間往漢州秋往閬州祭故相國房公為王使君作論巴蜀安危表冬復回梓州

遠遊 聞官軍收河南河北 春日梓州登樓二首

花底 柳邊 春日戲題 鄭城西原送李判官

題鄭城原郭明府茅屋 奉送崔都水 陪李王

蘇李四使君登惠義寺 涪江泛舟送韋班 涪城

香積寺官閣 送竇九歸成都 送路侍御入朝

泛江送客 上牛頭寺 望牛頭寺 上兜率寺

望兜率寺 泛江送魏倉曹 登牛頭山亭子 送

何侍御歸朝 數陪李梓州泛江有女樂為艷曲二

首 惠義寺送王少尹 送韋司直 絕句 短歌

行送叩錄事 惠義寺送辛員外 又送 東津送

韋諷攝閬州錄事 巴西驛亭觀江漲三首 行次

鹽亭縣 倚杖 陪王漢州泛房公西池 舟前小

鷺兒 官池春鴈二首 得房公池鷺 答楊梓州

甘園 寄題江外草堂 陪章雷後惠義寺餞崔



都督 陪章留後宴南樓 臺上得涼字 送王十

五判官 隨章留後新亭春送 章梓州橘亭餞竇

少尹 章梓州水亭 戲作寄上漢中王二首 櫻

拂子 送元二適江左 送陵州路使君 投簡梓

州幕府 客舊館 九日 薄暮 薄遊 王閬州

筵酬十一舅 閬州奉送二十四舅 閬州東樓送

十一舅 南池 放船 與嚴二歸奉禮別 贈裴

南部 對雨 警急 王命 征夫 漁陽 西山

三首 遣憂 巴山 早花 城上 送李卿 發

閬州 歲暮 舍弟占歸草堂 江陵望幸 桃竹

枝引贈章留後 冬狩行 入奉行 山寺 將適

吳楚留別章使君兼幕府諸公 收京 贈別賀蘭

銛 有感五首 寄賀 蘭銛 愁坐 避地

甲辰 廣德二年春正月立雍王适為皇太子嚴武以山陵

橋道使封鄭國公遷黃門侍郎復節度劍南未幾破

吐蕃收鹽川加檢校吏部尚書冬十月

吐蕃入寇京師戒嚴十一月吐蕃軍潰

公年五十三自梓州往閬州聞嚴武復鎮因歸成都武表公為節度叅謀檢校工部員外郎賜緋魚袋遂居幕

府有東西兩川說

閬山歌 閬水歌 巴西聞收京二首 泛江 江

亭送辛別駕 陪王使君泛江二首 傷春五首

釋悶 江亭王閬州筵餞蕭遂州 滕王亭子二首

玉臺觀二首 渡江 暮寒 憶昔二首 奉寄

章侍御 遊子 雙燕 百舌 別房太尉墓 自

閬州領妻子赴蜀山行三首 將赴成都途中先寄

嚴鄭公五首 春歸 歸來 草堂 四松 水檻

破船 絕句六首 題桃樹 登樓 奉寄高常

侍 過南鄰朱山人水亭 過故斛斯校書莊二首

寄邛州崔錄事 寄司馬山人 贈王侍御契

別唐十五誠 長吟 歸鴈 絕句二首 韋諷宅

觀曹將軍畫馬圖引 送韋諷上閬州錄事 丹青

上二下三

詩書堂



引贈曹將軍霸 送李員外布 寄董卿嘉榮 青

絲 黃河二首 揚旗 軍中醉 飲寄沈八劉叟

立秋日雨 和嚴鄭公軍城早秋 院中晚晴懷西

郭茅舍 到村 村雨 倦夜 遺悶呈嚴鄭公

宿府 樹間 送舍弟穎赴齊州三首 嚴鄭公階

下新松 嚴鄭公宅同詠竹 觀岷山施江畫圖

陪嚴鄭公摩訶池泛舟 陪鄭公北池臨眺 初冬

太子張舍人遺織成褥段 題鄭十八著作 至

後 觀李固請司馬弟山水 圖三首 哭鄭司戶蘇少監

乙巳 永泰元年春正月大赦改元二月黨項羗寇京兆之

富平三月辛亥大風拔木春大旱四月始雨嚴武卒

以郭英又為成都尹秋七月又旱冬十月吐蕃及回

紇入寇逼京師未幾回紇請降郭子儀敗吐蕃於靈

臺閏十一月崔旰反寇成都郭英又奔靈池是年袁

黽自台州反陷信明等州方伏誅而歛州人又殺其

公年五十四辭幕府正月三日歸草堂五月下戎州至

渝州六月至忠州秋至雲安

正月三日歸溪上 營屋 春日江村五首 春遠

暮登四安寺 絕句三首 屏跡 天邊行 柵

樹為風雨所拔歎 喜雨 莫相疑行 赤霄行

去蜀 宿青溪驛 狂歌行贈四兄 喜雨 宴戎

州楊使君東樓 渝州侯嚴侍御不到 撥悶 聞

高常侍亡 宴忠州使君姪宅 禹廟 題忠州龍

興寺 哭嚴僕射歸觀 放船 旅夜書懷 懷舊

雨 茅屋為秋風所破歌 八月十五夜月二首

雲安九日 錦樹行 長江二首 奉漢中王手

札 石硯 聞故房相靈輓歸葬東都二首 別常

徵君 遣憤 鄭典設自施州歸 寄裴施州 奉

賀陽城郡王太夫人恩命 冬深 將曉二首 十

二月一日三首 又雪 送 王侍御往東川放生池祖席

上 乃 痛 寺 之 音 丁

百 貴 亭 之 音 丁



丙午

大曆元年春二月吐蕃遣使來朝杜鴻漸入蜀平崔旰之亂尋表旰為節度使步將吳璘殺渝州刺史劉

公年五十五於是年春自雲安至夔州為栢都督作謝

上表秋寓西閣

立春 懷錦水居止二首 老病 雨 南楚 子  
 規 水閣朝霽 往在 客居 客堂 杜鵑 贈  
 鄭十八賁 別蔡著作 答鄭十七郎 寄贈王將  
 軍 寄韋有夏郎中 八哀詩 移居夔州作 船  
 下夔州 漫成 上白帝城 謁先主廟 春陵行  
 武侯廟 八陣圖 贈崔評事公輔 曉望白帝  
 城鹽山 陪諸公宴越公堂 白帝城最高樓 上  
 白帝城二首 古柏行 負薪行 最能行 愁  
 遣悶呈路曹長 覽柏中丞兼子姪制詞 遣懷  
 王十五前閣會 暮春 寄常徵君 園官送菜

課伐木 除草 引水 園人送瓜 信行遠修水  
 筒 催宗文樹雞柵 示僚奴阿段 貽華陽柳少  
 府 峽中覽物 憶鄭南毗 寄李祕書二首 雷  
 送王信州北歸 火 熱三首 七月一日題終  
 明府水樓三首 七月三日 牽牛織女 毒熱寄  
 崔評事 雨三首 種蒿苴 灩澦堆 宿江邊閣  
 白鹽山 瞿唐懷古 黃草峽 陪柏中丞觀宴  
 將士二首 奉漢中王手札報韋侍御蕭尊師  
 覽鏡呈柏中丞 諸將五首 壯遊 聽楊氏歌  
 秋日夔府詠懷 存歿口號二首 送十五弟使蜀  
 送李功曹 別崔溟 巫峽贈四舅 君不見簡  
 蘇溪 贈蘇四溪 別蘇溪 白帝 雨 雨晴  
 垂白 洞房 宿昔 能畫 鬪雞 歷歷 洛陽  
 驪山 提封 贈高式顏 偶題 吾宗 第五弟  
 豐無消息二首 送田四弟 解悶十二首 哭王  
 彭州 峽口二首 秋風二首 西閣二首 社日  
 二首 江月 吹笛 鴈 遣愁 夔州書懷 贈  
 李十五丈別 送覃二判官 江上 戲寄崔評事



西閣雨望 晚晴吳郎見過 九日諸人集于林

夜 秋日寄題鄭監湖亭三首 秋興八首 寄

柏學士林居 殿中楊監示張旭草書圖 又出書

鷹十二扇 送楊監赴蜀 孟冬 悶 雷 朝二

首 南極 晚 西閣夜 月圓 中宵 不寐

鷗 猿 黃魚 白小 鹿 鸚鵡 雞 昔遊

寄杜位 送鮮于萬州 西閣期嚴明府不到 西

閣曝日 小至 荆南兵馬太常卿趙公大食刀歌

王兵馬二角鷹 縛雞行 玉腕驪 黑白二鷹

二首 奉送柏二別駕 閣夜 灤西寒望 奉送

十七舅 送王十六判官 不 離西閣二首 謁真諦寺禪師

丁未 大曆二年夏六月杜鴻漸入朝秋七月以崔旰為

節度使九月吐蕃入寇京師戒嚴路嗣恭敗之

公年五十六春在夔遷居赤甲二月遷灤西秋遷東屯

未幾復歸灤西

赤甲 入宅三首 江雨 雨不絕 崔評事許相

迎 畫夢 熟食日 示宗文宗武 又示兩兒 晴

二首 雨 卜居 暮春題灤西新賃草堂五首

歡喜口號絕句十二首 得舍弟觀書 喜觀即到

二首 寄薛郎中 卽事 懷灤上遊 月 晚登

灤上堂 李潮八分小篆歌 醉為馬墜 登子至

槐葉冷淘 園 歸 上後園山脚 諸葛廟

舍弟觀歸藍田迎新婦送示二首 行官張望補稻

畦水歸 返照 灤瀕 季夏送鄉弟韶 夔州歌

十絕句 上卿翁請修武侯廟 又上後園山脚

夜雨 峽隘 行官張望督促東渚耗稻向畢 阻

雨不得歸灤西 柴門 甘林 暇日 月 見螢

火 寄劉峽州 草閣 月 十七夜對月 白露

孟氏 驅豎子摘蒼耳 寄狄明府 寄韓諫議

寄岑嘉州 魏將軍歌 秋峽 日暮 月 曉

望 別李祕書 九月一日 過客相尋 孟倉曹

遺酒醬 課小豎鉏果林三首 中夜 復愁十二

首 季秋江村 搖落 季秋江樓夜宴三首 暮

上江不歸戶寺之舊

讀書堂



歸 送孟倉曹赴選 憑孟覓舊莊 耳聾 小園

夜 奉酬薛十二丈 送李祕書赴杜相公幕

贈李八祕書別 奉送韋中丞 聞惠子過東溪

大覺高僧蘭若 自讓西移居東屯茅屋四首 簡

吳郎司法 又呈吳郎 題柏大兄弟山居屋壁二

首 覃山人隱居 柏學士茅屋 東屯月夜 東

屯北嶼 夜二首 草堂檢校收稻二首 秋夜五

首 傷秋 雨 秋清 瞿唐兩崖 暝 雲 晨

雨 天池 卽事 獨坐二首 雨四首 返照

向夕 大曆二年九月三十日 十月一日 戲作

俳諧二首 從驛次草堂復至東屯二首 暫往白

帝 刈稻了詠懷 柳司馬至 自平 久雨期王

將軍不至 虎牙行 寫懷二首 觀公孫大娘弟

子舞劍器行 有歎 寒雨 白鳧行 冬至 舍

弟子觀取妻子到江陵喜寄三首 寄別李劍州

別李義 送高司直 白帝城樓 夜宿西閣 西

閣口號 寄從孫崇簡 奉送卿二翁 白帝樓

夜歸 夜聞箏篋 前苦寒行二首 晚晴 復陰

首 後苦寒行二 別張建封

戊申 大曆三年夏四月崔旰入朝秋八月吐蕃寇靈武九

月鳳翔都將李晟屠吐蕃定秦堡吐蕃遁是年部卒

翟封殺開州刺史蕭崇之以叛楊子琳討平之又商

州兵馬使劉洽殺殷仲卿幽州兵馬使朱希彩殺節

度使李 懷仙

公安冬之岳陽 公年五十七是年正月去夔出峽三月至江陵秋晚遷

元日示宗武 又示宗武 遠懷舍弟 太歲日

喜聞盜賊蕃寇總退口號五首 續得觀書 江梅

庭草 將到巫峽 送大理封主簿 大曆三年

春出瞿唐 巫山縣畱別 春夜峽州畱宴 敬寄

族弟唐使君 泊松滋江亭 行次古城店 乘雨

入行軍六弟宅 上巳日宴集 宴胡侍御書堂



書堂夜月下賦絕句 江南逢李龜年 南征地

隅 歸夢 奉送李長史 暮春江陵送馬大卿

陪李尚書泛舟 蠶穀行 三絕句 和宋少府

重泛鄭監前湖 惜別行送向卿 送崔侍御常正

字 送宇文石首聯句 多病執熱懷李尚書 水

宿遣興 遣悶 陽城郡王新樓 又奉衛王 江

邊星月二首 舟月對驛近寺 舟中 秋日荆南

述懷 江漢 遠遊 折檻行 送石首薛明府

哭李尚書 重題 獨坐 舟中出江陵 移居公安山

使君宅二首 久客 醉歌行贈顏少府 贈衛大郎

館 官亭夕坐 贈虞司馬 公安懷古 呀鵲行

公安送韋少府 憶昔行 送顧八分文

學 留別太易沙門 曉發公安 發劉郎浦 別

董頌 幽人 泊岳陽城下 纜船苦風 登岳

陽樓 送魏少府 冬晚送長孫舍人 歲晏行

大曆四年春正月郭子儀入朝夏五月以僕固懷恩

女嫁回紇冬十月杜鴻漸卒吐蕃寇關內靈州常謙

光敗

公年五十八春自岳陽之潭州未幾入衡州夏回潭州

宗文卒秋欲適漢陽不果

陪裴使君登岳陽樓 送重表姪王砮 過南嶽

宿青草湖 宿白沙驛 上水遣懷 湘夫人祠

祠南夕望 遣遇 解憂 宿鑿石浦 早行 過

津口 次空靈岸 宿花石戍 早發 次晚洲

發白馬潭 歸鴈 野望 入喬口 銅官渚守風

北風 詠懷二首 望嶽 清明二首 客從

發潭州 雙楓浦 酬郭判官 衡州送李大府七

丈 回棹 餞裴端公 哭韋大夫 江閣臥病

送韋員外 酬韋韶州 樓上 千秋節有感二首

蘇侍御江浦訪誦近詩 可歎 奉贈盧參謀

惜別行送劉判官 重送劉判官 登舟將適漢陽

上二下三寺已皆了

讀詩



送殷參軍 送盧侍御 風疾舟中伏  
枕書懷 舟中夜雪 對雪 送蘇侯

庚戌

大曆五年夏四月湖南兵馬使臧玠殺其團練使崔  
璿澧州刺史楊子緜道州刺史裴虬衡州刺史陽濟

討平之

公年五十九春在潭州率舟居夏避臧玠亂入衡州欲

往郴州依舅氏因至耒陽聞賊平回潭州欲歸襄陽道

卒殯于岳陽

追酬高蜀州人日見寄 奉贈蕭使君 奉送二十

三舅 送魏司直 送趙明府 貽李員外子裴

歸鴈二首 小寒食 燕子來舟中 清明 贈韋

贊善 風雨看舟前落花 岳麓山道林二寺行

奉酬寇侍御 白馬 入衡州 舟中苦熱 江閣

對雨 題衡山文宣王廟 朱鳳行 聶耒陽致酒

南幕府親友 過洞庭湖

丙 長沙送李衡 西別湖

南幕府親友 過洞庭湖

南幕府親友 過洞庭湖

南幕府親友 過洞庭湖

南幕府親友 過洞庭湖

杜工部編年詩史譜目 終

杜工部編年詩史譜目

杜工部編年詩史譜目



杜工部文集註解目錄

卷之一

讀書堂杜工部文集註解目錄

卷之一

天狗賦 并序

○○進鵬賦表

○○鵬賦

進三大禮賦表

朝獻太清宮賦

○朝享太廟賦

有事於南郊賦

○○進封西嶽賦表

○○封西嶽賦 并序

○○畫馬讚

○○唐興縣客館記

○雜述

○○秋述

○說旱

杜工部文集

卷一

讀書堂



○○東西兩川說

卷之二

乾元元年華州試進士策問五首

○○奉謝口勅放三司推問狀 為遺補薦岑參狀

○○為華州郭使君進滅殘寇形勢圖狀

○○為閩州王使君進論巴蜀安危表

為夔府柏都督謝上表

前殿中侍御史柳公紫微仙閣畫太一天尊文

祭遠祖當陽君文 祭外祖祖母文

○○祭故相國清河房公文

○○唐故萬年縣君京兆杜氏墓誌

○唐故范陽太君盧氏墓誌

○唐故德儀贈淑妃皇甫氏神道碑

讀書堂杜工部文集註解目錄





讀書堂杜工部文集註解卷之一

柳璟子孚

滎陽張 潛上若評註 男 榕端樸園校訂

橋恒子久


天狗賦 并序○原註年譜云按玄宗天寶六載詔天  
下有一藝者赴京公應詔退下留京師是年  
十月上幸華清宮公因至獸坊作天狗賦又按長安  
東驪山有溫泉水浴可愈疾初秦始皇砌石起室漢  
武帝又加修飾唐貞觀間建湯泉宮咸亨間改溫泉  
宮天寶六載改華清宮又築羅城置百司及十宅每  
歲十月上  
巡幸焉

天寶中上冬幸華清宮甫因至獸坊怪天狗院列在諸獸

上文註釋卷一

讀書堂

杜工部文集註解卷之一  
讀書堂





院之上胡人云此其獸猛健無與比者甫壯而賦之尚恨其與凡獸相近

澹華清之莘莘漠漠而山殿戍削縹與天風崛乎迴薄上

揚雲旂兮下列猛獸夫何天狗嶙峋兮氣獨神秀色似狻

猊小如猿狖忽不樂雖萬夫不敢前兮非胡人焉能知其

去就向若鐵柱欹而金鎖斷兮事未可救瞥流沙而歸月

窟兮天狗來自西域卽西旅貢獒之類故以流沙月窟言之斯豈踰晝日食君之鮮

肥兮性剛簡而清瘦敏於一擲威解兩鬪終無自私必不

虛透嘗觀乎副君暇豫奉命于畋則蚩尤之倫已脚渭戟

涇提挈丘陵與南山周旋而慢圍者戮實禽有所穿伊鷹

隼之不制兮呵犬豹以相纏蹙乾坤之翕習兮望麋鹿而

飄然由是天狗捷來發自於左頓六軍之蒼黃兮劈萬馬

以超過材官未及唱野虞未及和問髡矢與流星兮髡矢鳴鏑

也圍要害而俱破泊千蹄之迸集兮始拗怒以相賀真雄

姿之自異兮已歷塊而高臥不愛力以許人兮能絕甘以

爲大音馱既而羣有噉咋勢爭割據垂小亡而大傷兮翻投

跡以來預劃雷殷而有聲兮紛膽破而何遽似爪牙之便

禿兮無魂魄以自助各弭耳低徊閉目而去朱云以上皆敘馳獵之事



每歲天子騎白日御東山百獸蹶蹶以皆從兮四猛仡銛

銳乎其間夫靈物固不合多兮胡役役隨此輩而往還惟

昔西域之遠致兮聖人爲之豁迎風虛露寒迎風寒露二殿各體

蒼螭軋金盤初一顧而雄材稱是兮召羣公與之俱觀宜

其立閭闔而吼紫微兮却妖孽而不得上干時駐君之玉

輦兮近奉君之渥歡使臭處而誰何兮臭犬視貌他本非備周

垣而辛酸彼用事之意然兮匪至尊之賞闕用事謂養獸職事之人意

則如此非上不加賞也仰千門之峻嶒兮覺行路之艱難懼精爽之

衰落兮驚歲月之忽殫顧同儕之甚少兮混非類以摧殘

偶快意於校獵兮尤見疑於躡捷此乃獨步受之於天兮

孰知羣材之所不接且置身之暴露兮遭縱觀之稠疊俗

眼空多生涯未愜吾君儻憶耳尖之有長毛兮寧久被斯

人終日馴狎已

進鵬賦表

原註年譜云天寶九載公在京師嘗進鵬賦在進三大禮賦之先

臣甫言臣之近代陵夷公侯之貴磨滅鼎銘之勲不復照

曜於明時自先君恕預以降奉儒守官未墜素業矣亡祖

故尚書膳部員外郎先臣審言修文於中宗之朝高視於

藏書之府故天下學士到於今而師之臣幸賴先臣緒業



自七歲所綴詩筆向四十載矣約千有餘篇今賈馬之徒得排金門上玉堂者甚衆矣惟臣衣不蓋體常寄食於人奔走不暇只恐轉死溝壑安敢望仕進乎伏惟天子哀憐之明主儻使執先祖之故事拔泥塗之久辱則臣之述作雖不足以鼓吹六經先鳴數子至於沉鬱頓挫隨時敏捷而揚雄枚臯之流庶可跂及也有臣如此陛下其舍諸公每自負有東方生之詼諧伏惟明主哀憐之無令役役便至於衰老也臣甫誠惶誠恐頓首頓首死罪死罪臣以為鵬者鷲鳥之殊特搏擊而不可當豈但壯觀於旌門發狂於原隰引以為類是大臣正色立朝之義也臣竊重其有英雄之姿故作此賦實望以此達於聖聰矣不揆蕪淺謹投延恩既進表獻賦以聞謹言

古茂雅令逼真漢文至其立言有致令人千載下想其風流

鵬賦

當九秋之淒清見一鷲之直上以雄材為己任橫殺氣而獨往梢梢勁翮肅肅遺響杳不可追俊無畱賞彼何鄉之性命碎今日之指掌伊鷲鳥之累百鷲鳥累百不如一鷲敢同年而爭長此鷲之大略也若乃虞人之所得也必以氣稟玄冥



陰乘甲子河海蕩滴風雲亂起雪互山陰冰纏樹死迷向  
 背於八極絕飛走於萬里朝無以充腸夕違其所止頗愁  
 呼而蹭蹬信求食而依倚用此時而椽杙待尤者而綱紀  
 表狎羽而潛窺順雄姿之所擬歛捷來於森木固先繫於  
 利觜謂以囹解騰覆而竦神開網羅而有喜獻令朱本  
 課數備而已及乎閩朱本隸受之也則擇其清質列在周  
 垣揮拘孿之掣曳控豪梗之飛翻謂條鏃識改遊之所使  
 登馬上而孤騫然後綴以珠飾呈於至尊搏風槍彘用壯  
 旌門乘輿或幸別館獵平原寒蕪空闊霜仗喧繁觀其夾

翠華而上下卷毛血之崩奔隨意氣而電落引塵沙而晝

昏鳥俊鵲之豁堵牆之榮觀棄功效而不論斯亦足重也

至如千年孽狐三窟狡兔恃古塚之荆棘飽荒城之霜露

迴惑我往來趁起我場圃雖青骹帶角白鼻如瓠蹙奔蹄

而俯臨飛迅翼而還寓而料全於果見迫寧遠屢攬之而

穎脫便有若於神助是以嗥哮其音颯爽其慮續下構而

繚繞尚投跡而容與奮威逐北施巧無據方蹉跎而就擒

亦造次而難去一奇卒獲百勝昭著夙昔多端蕭條何處

斯又足稱也爾其鶴鵠鴟鴞之倫莫益於物空生此身聯



拳拾穗長大如人肉多奚有味乃不珍輕鷹隼而自若託  
 鴻鵠而為鄰彼壯夫之慷慨假強敵而逡巡拉先鳴之異  
 者及將起而復臻忽隔天路終辭水濱寧掩羣而盡取且  
 快意而驚新此又一時之俊也夫其降精於金金天殺氣立骨  
 如鐵爪剛如鐵目通於腦筋入於節佳句架軒楹之上純漆光芒  
 掣梁棟之間寒風凜冽雖趾躄千變林嶺萬穴擊叢薄之  
 不開突杈枒而皆折又有觸邪之義也久而服勤是可吁  
 畏必使烏攫之黨罷鈔盜而潛飛梟怪之羣想英靈而虛  
 墜豈非豈非朱本作豈此乎虛陳其力叨竊其位等摩天而自安與

槍榆而無事者矣故不見其用也則晨飛絕壑暮起長汀  
 來雖自負去若無形置巢截桌養子青冥倏爾年歲茫然  
 闕庭莫試鉤爪空迴斗星眾雛儻割鮮於金殿此鳥已將  
 老於巖扃卒傷此鳥之不得見試蓋以自喻寓意可感

始終借鵬自喻公後為拾遺丰裁可以想見中鋪敘有法景真語警即置漢賦內亦可○椽杙長楊賦椽截斲而為杙杙槩也○烏攫黃霸傳吏出食於道旁烏攫其肉○空迴斗星元命苞瑤光星散為鷹○朱本改字皆本之文粹英華

### 進三大禮賦表

原註年譜云按玄宗天寶十載正月八日壬辰朝獻太清宮癸巳朝享太

廟甲午有事于南郊公時在京師進三大禮賦上奇之命待制集賢院召試文章



臣甫言。臣生長陛下淳樸之俗。行四十載矣。與麋鹿同羣。而處浪跡陛下。豐草長林。實自弱冠之年矣。豈九州牧伯不歲貢豪俊於外。豈陛下明詔不仄席思賢於中哉。臣之愚頑。靜無所取。以此知分。沉埋盛時。不敢依違。不敢激訐。默以漁樵之樂自遣而已。詞意雅飭頃者賣藥都市。寄食朋友。竊慕堯翁擊壤之謳。適遇國家郊廟之禮。不覺手足蹈舞。形於篇章。漱吮甘液。游泳和氣。聲韻寢廣。卷軸斯存。抑亦古詩之流。希乎述者之意。不嫌自譽然詞理野質。終不足以拂天聽之崇。高配史籍以永久。恐倏先狗馬遺恨九原。謹稽

首投延恩。甄獻納上表。進明主朝。獻太清宮。朝享太廟。有事於南郊等三賦。以聞。臣甫誠惶誠恐頓首頓首謹言。

延恩甄則天臨朝。鎔銅為甄。四面置門。東西名曰延恩甄。上賦頌求官爵者投之。

朝獻太清宮賦

太清宮即本三清名之薦享聖祖。元皇帝即老子。又於寶仙洞求得老

子妙寶真符時。立宗遵道教慕長生。

冬十有一月。天子既納處士之議。承漢繼周。革弊用古。勒崇揚休。此敘唐家致太平之功而致祭列祖明年孟陬。將攄大禮。以相籍越。彝倫而莫儔。歷良辰而戒吉。分祀事而孔修。此言朝獻太清宮營室主夫宗廟。乘輿備乎冕裘。甲子王以昧爽。春寒薄而清。



浮虛閭闔逗蚩尤也旗張猛馬出騰虬梢熒惑隨旄頭風伯

扶道雷公挾軻通天台之雙闕警溟漲之十洲浩劫礪礪

萬僊颼颼歛臻於長樂之舍嵬入乎崑崙之丘太一奉引

庖犧左右堯步舜趨禹馳湯驟鬱閔宮之律萃坼元氣以

經構斷紫雲而竦牆老子關門紫氣撫流沙而承雷老子之流沙紛墮

朱本作隋珠而陷碧燿音酷波錦而浪繡森青冥而欲雨艷光炯

而初晝於是翠蕤俄的此言百祥諸神畢集藻籍舒就祝融擲火以

焚香溪女捧盤而盥漱羣有司之望幸辯名物之難究瓊

漿自間於棗盛羽客先來於介胄爍聖祖之儲祉敬雲孫

而及此詔軒轅使合符勅王喬以視履積昭感於嗣續匪

正辭於祝史匪與棐通輔也若胥蟹而有憑肅風颺而乍起揚流

蘇於浮柱金英霏而披靡咀吸金英擬雜珮於曾巔孔蓋欵以

颯纏音史中縱縱以迴復外蕭蕭而未已上穆然注道為身

覺天傾耳此段言甲視五代陳僭號於五代復戰國於千祀日鳴

呼昔蒼生纏孟德之禍為仲達所愚鑿齒其俗窳窳其孤

赤烏高飛不肯止其屋黃龍哮吼不肯負其圖伊神器梟

兀而小人响喻歷紀大破創痍未蘇尚攫拏於吳蜀又顛

躓於羯胡縱羣雄之發憤誰一統於亨衢在拓跋與宇文



豈風塵之不殊。比聰。鬼及堅特。混。貔。豹而齊。驅。愁。陰。鬼。嘯。落。日。梟。嘯。各。擁。兵。甲。俱。稱。國。都。且。耕。且。戰。何。有。何。無。惟。累。聖。之。徽。典。恭。淑。慎。以。允。緝。茲。火。土。之。相。生。非。符。讖。之。備。及。

此段言唐室崛起與治化所感

煬帝初暴叔寶初襲編簡尚新義旗爰入

既清國難方觀家給竊以為數子自誣敢貞乎五行攸執而觀者潛晤或喜至於泣鱗介以之鳴篋毘跂以之振蟄感而遂通罔不具集。仡。神。光。而。甜。音。酬。音。聞。音。羅。詭。異。於。戢。音。

集音地軸傾而融曳洞宮儼以凝岌九天之雲下垂四海之水皆立鳳鳥威遲而不去鯨魚屈矯以相吸掃太始之含

靈卷殊形而可挹則有虹霓為鈎帶者

指羣入自於東揭仙言

莽蒼履崆峒素髮漠漠至精濃濃條弛張於巨細覲披寫於心胷蓋脩竿無隙而仄席已容裂手中之黑簿睨堂下之金鐘得非擬斯人於壽域明返樸於玄蹤忽翳日而翻萬象却浮雲而留六龍咸警跖而壯茲應終蒼黃而昧所從上猶色若不足處之彌恭天師張道陵等洎左玄君者前千二百官吏謁而進曰學封禪典引之文今王巨唐帝之苗裔坤之紀綱此段稱頌本朝見宜直接殷周漢統并封三恪事上配君服宮尊臣商起數得統特立中央土德為中且大樂在懸黃鐘冠八音之首



太昊斯啓

太昊乘震司春

青陸獻千春之祥曠哉勤力耳目

謂羣臣

宜乎大帶斧裳故風后孔甲充其佐山稽岐伯翼其傍至

於易制取法

謂創制禮樂

足以朝登五帝夕宿三皇信周武之

多幸存漢祖之自強且近朝之濫吹

謂五代冒濫不足重

仍改卜乎

祠堂初降素車終勤恤其後有客白馬固漂淪不忘

謂求殷周

漢子孫為三恪也

伊庶人得議

謂處士崔昌

寔邦家之光臣道陵等試

本之於青簡探之於縹囊

謂考之古典

列聖有差夫子聞斯於

老氏好問自久宰我同科於季康敢撥亂反正乃此其所

長萬神開八駿廻

此言祭畢回駕

旗掩月車奮雷騫七曜燭九垓

能事穎脫清光大來

謂天地清寧

或曰今太平之人莫不優游

以自得况是蹴魏踏晉批周抉隋之後與夫更始者哉

此當是祀老子文明皇追祖老子號玄元皇帝天寶二年加號太聖祖○按天寶九載八月處士崔昌上言國

家宜承漢統以土代火周隋皆閏位不當以其子孫為二王上乃命求殷周漢後為三恪廢韓介鄴公韓元魏

後介後周後鄴隋後○正月為孟陬謂日月所會之星躔○營室即詩定之方中為清廟歲星○熒惑旄頭二

惡星天台山名十洲仙境○長樂宮名○黃帝宮在崑崙太一天神之貴者○施大赤也○的明也藻籍以藉

圭就一匝也祝融五祀之官主火正溪女道書有十二溪女皆陰神○敬雲孫以能盡敬之雲孫而來祭也軒

轅黃帝名○王喬為葉令有神術帝訝其來數令太史候之有雙鳧飛來網得之喬易也乃四年中尚方所賜

也○疥蠶濕生蟲蚊之類言大福之來如此蟲羣飛而多也○流蘇即繡毬從從發散貌○鑿齒窳窳皆惡黨○



負圖黃帝過洛河龍負圖書赤文綠字臬兀危也响喻和悅貌○拓跋東西魏宇文為後周聰鹿堅特劉聰慕容鹿符堅李特也○歷代紀運圖隋以火德唐以土德也○簾鐘鼓架刻猛獸形其上○神光即鬼神紺闕開大也香衆也洞宮仙宮也○脩竿元氣長也言盛治綿長無間而片席之地已容諸神也罪簿有黑絲白○忽翳日三句言神來蔽日改觀而留侍龍輦咸恐懼躡足以應○張道陵真人左元君其弟子屬官也○東方青日行東陸故青○大帶紳也芥裳取斷○風后孔甲山稽岐伯四人皆古賢臣○素車祭車尚質故素○孔子問祿祭於老氏宰我問五帝之德於夫子季康亦嘗問仁○杜公課伐木詩等古質宋文流易宜舊註譏之

原註

蔡條西清詩話云杜少陵文自古奧如九天之雲下垂四海之水皆立忽翳日而翻萬象却浮雲而

留六龍乃舞陵亂又浩乎春風壯而江海波其語磊落驚人或言無韻者殆不可讀是大不然蘇東坡有美堂詩云天外薰風吹海立浙東飛雨過江來蓋出於此也嚴有翼藝苑雜錄云秦少游嘗言人才各有分限杜子美詩冠古今而無韻者殆不可讀曾子固以文名天下而有韻者輒不工此未易以理推也余比觀西清詩話乃不然此說云杜少陵文自古奧所舉數語出朝獻太清宮賦誠磊落驚人此謂之有韻之作可乎竊意少游所謂無韻不可讀者不過課伐木詩序之類而已後山詩話云杜之詩法韓之文法也詩文各有體韓以文為詩杜以詩為文故不工耳

朝享太廟賦

初高祖太宗之櫛風沐雨致祭太祖太宗勞身焦思用黃鉞白旗者五年而天下始一歷三朝而戮力今庶績之大備上方采靡俗之謠稽正統之類蓋王者盛事臣聞之於里曰昔武德以前黔黎蕭條無復生意遭鯨鯢之蕩汨荒歲月而



沸渭哀服紛紛朝廷多閏者仍互乎晉魏臣竊以自赤精

之衰歇陶唐據火德而漢紹之為赤精曠千載而無真人及黃圖之經綸

息五行而歸厚地唐以土德王故云則知至數不可以久缺凡材

不可以長寄故高下相形而尊卑各異惟神斷繫之於是

本先帝取之於義壬辰既格于道祖乘輿卽於是日致齋

於九室此下言祭太廟禮儀之盛所以昭達孝之誠所以明繼天之質

具禮有數六官咸秩大輅每出或黎元不知豐年則多而

筐筥甚實既而太尉驂乘司僕扈蹕望重闈以肅恭順法

駕之徐疾公卿淳古士卒精一黝音禪黑也宗廟之愈深抵職

司之所密宿翠華於外戶曙黃屋於通衢氣淒淒於前旒

光靡靡於嘉栗階有賓阼帳有甲乙升降之際見玉柱生

芝擊拊之初覺鈞天合律筍簾佻以碣磬干戚宛而婆娑

鞀鼓塤篪為之主鐘磬竽瑟以之和雲門咸池取之至空

桑孤竹貴之多八音脩通既比乎旭日升而氛埃滅萬舞

凌亂又似乎春風壯而江海波鳥不敢飛而玄甲嶢嶢以

岳峙象不敢去而鳴佩劍燭以星羅已而上乾豆以登歌

美休成之既饗璧玉儲精以稠疊門闌洞豁而森爽黑帝

歸寒而激昂蒼靈戒曉而來往熙事莽而充塞羣心慶以



振蕩桐花未吐孫枝之鸞鳳相鮮雲氣何多宮井之蛟龍

亂上若夫生弘佐命之道死配貴神之列此言功臣配享之榮則殷

劉房魏之勲是可以中摩伊呂上冠夔高與契同代天之工

為人之傑丹青滿地松竹高節自唐興以來若此時哲皆

朝有數四數四字意未詳名垂卓絕向不遇反正撥亂之主君臣

父子之別奕葉文武之雄注意生靈之切雖前輩之溫良

寬大豪俊果決曾何以措其筋力與韜鈴載其刀筆與喉

舌使祭則與食則血若斯之盛而已爾乃直于主索于祔

此言情文備而致休祥警幽全之物散純道之精告幽全之物者貴純之道也蓋

我后常用惟時克貞營以蕭合酌以茅明嘏以慈告祝以

孝成故天意張皇不敢殄其瑞神姦妥帖不敢秘其精邪

則精隱故曰秘而撫絕軌享鴻名者矣于以奏永安于以奏王夏

福穰穰於絳闕芳菲菲於玉笋沛枯骨而破盲聾施殍未

作胎而逮鰥寡園陵動色躍在藻之泉魚弓劔皆鳴汗鑄

金之風馬漢金馬門霜露堪吸禎祥可把曾宮獻歆陰事儼雅

薄清輝於鼎湖之山靜餘響於蒼梧之野上窅然漠漠惕

然兢兢此言主上謙謹紛益所慕言慕之多若不自勝瞰牙旗而獨立

吟翠駮而未乘五老侍祠而精駭千官逃聽而思疑於是



丞相進曰

時李林甫陳希烈為相

陛下應道而作惟天與能

此言羣臣頌德

高往

澆訛散淳樸登尚猶日慎業業孝思烝烝恐一物之

失所懼先王之咎徵如此之勤恤匪解是百姓何以報夫

元首在臣等何以充其股肱且如周宣之教親不暇孝武

之淫祀相仍諸侯敢於迫脅方士奮其威稜

歸于譎諫○玄宗好神仙

而公言及此不愧拾遺

一則以微言勸內

承周

一則以輕舉虛憑

承漢

武謂上仙飛昇也

又非陛下恢廓緒業其瑣細亦曷足稱丞相退

上躅天踏地授綏登車

此言祭畢回駕

伊鴻洞槍纍先出為儲胥

本枝根株乎萬代睿思經緯乎六虛甲午方有事於采壇

紺席宿夫行所如初

即過到郊天

駢麗繁富中有樸茂之致勝宋人多矣○鯨鯢大魚謂不義之人沸渭奮擊貌○多聞史謂莽不得正王之位

如積歲月之餘為閏○神斷謂主上決斷道祖謂老子明堂有九室○翠華旗也黃屋天子乘車通術術遂也

徑上有遂穀初熟曰粟○漢武作甲乙之帳○仡壯勇貌碣磳盛怒也○雲門黃帝樂咸池堯樂空桑謂琴瑟

孤竹謂管○崤嶰深密也剡燿有光也休成叔孫通所奏樂○黑帝冬帝也蒼靈春帝也麋恐懼貌○殷劉房

魏殷開山劉文靜房玄齡魏徵也○直祭祝于主索祭祝于祊縮酌用茅明酌也○皇帝入門奏永安之樂出

入奏王夏之章○天胎少長曰天在孕曰胎○天子出建大牙旗翠駮馬名○堯遊首山有五老飛為流星○

詩黃鳥刺宣王也刺其以陰事教親而不至聯兄弟而不固○鴻洞大也以竹木為槍纍儲胥藩落之類○綵

壇謂泰壇祭天紺席謂高帝居堂下紺席西向配天行所即行在謂行宮也



有事於南郊賦

蓋主上兆於南郊，聿懷多福者舊矣。今茲練時日，練擇也就陽位之美，又所以厚祖考，通神明而已。職在宗伯，首崇禮祀。先是春官條頌祇之書，獻祭天之紀，令泰龜而不昧，俟萬事之將履，掌次閱瓊邸之則，封人考墳宮之旨，司門轉致乎牲牢之繫，小胥專達乎懸位之使。二之日，朝廟之禮既畢，天子蒼然視於無形，澹然若有所聽，又齋心於宿設，將盥食而匪寧，旌門坡陁以前，騫鼓騎反覆以相經，頓曾城之軋軋，軼萬戶之熒熒，馳道端而如砥，浴日上而如萍。

掣翠旄於華蓋之角，彗黃屋於鉤陳之星。先述出郊，鹵簿之盛，神仙戍削以落羽，颺颺幽憂以固局。戰岐慄華，擺渭掉涇，地回回而風淅淅，天泱泱而氣清清。甲冑乘陵，轉迅雷於荆門。巫峽玉帛清迴，霽夕雨於瀟湘洞庭。於是乘輿霈然乃作，翳夫鸞鳳將至，以冲融寥廓，不可乎彌度。聲明通乎純粹，溟滓為之垠堦，駟蒼螭而蜿蜒，若無骨而柔順，奔鳥攫朱本作獲即鳥獲，獲勇士。而黜繆，徒有勢於殺縛，朱輪竟野而杳冥，金鏐朱謂當作鏐，音犯馬冠也。成陰以結絡，吹堪輿以軒輊，搶寒暑以前却，搶爭取也。中營密擁乎太陽，宸眷眇臨乎長薄。林薄熊羆弭耳以



相舐虎豹高跳以虛攫上方將降帷宮之綈縹屏玉軌以

蠶略人門行馬以拱乎合沓之場皮弁大裘始進於穹崇

之幕衝牙鏗鏘以將集周衛轆轤而或若月窟西黑而扶

桑東寒田燭稠而曉星落肅定位以告潔此敘行郊天之禮藹嚴

上而清超雲菡萏以張蓋春歲蕤而達杓簪裾斐斐樽俎

蕭蕭方回曲折周禮正方位方回當作方面周旋寂寥必本於天王宮

祭與夜明祭月相射動而之地山林與川谷俱標此敘旁及羣祀於

是乎官有御事有職此總言禮物之盛所以敬鬼神所以勤稼穡

所以報本反始所以度長立極玄酒明水之上越席疏布

之側必取先於稻秬麴蘖之勤必取著於紛純文繡之飾

雖三牲八簋豐備以相沿而蒼璧黃琮實歸乎正色先王

之不業繼起信可以永其昭配羣望之徧祭在斯望于山川示

有以明其翼戴由是播其聲音以陳列此敘音樂之盛從乎節奏

以進退韶夏濩武采之於訓謨鍾石陶匏具之於梗槩變

方形於動植聽宮徵於砒磬英華發外非因乎筍簾之高

和順積中不在乎雷鼓之大既而腓脍骨柴燎窟塊此段

言福應之多駉若擘赫葩斜晦漬電纏風升雪颯星碎拂勿佻

澗眇溟漭淬聖慮岑寂玄黃增霈謂天地增澤蒼生顛昂毛髮



清籟即毛髮細物雷公河伯咸駭駭以脩聳霜女江妃乍

紛綸而晻曖執紱秉翟朱干玉戚鼓瑟吹笙金支翠旌神

光倏斂祀事虛明於是潛滌乎渙汗紆餘乎經營浸朱崖

南而灑朔漠北洵暘谷日出處而濡若英若木之英日出處耆艾涕

而童子儻叢棘圻狴牢朱本作狴傾是率土之濱覃醑醪以涵

泳非奉郊之縣獨宴慰以縱橫玄澤淡泞乎無極殷薦綢

繆乎至精稽古之時屢應符而合契聖人有作不逆寡而

雄成爾乃孤卿侯伯雜羣儒三老儼而絕皮軒趨帳殿稽

首日此段敘諸臣頌聖上德功超于前代臣聞燧人氏已往法度難知文質

未變太昊氏繼天而王根啓閉於厥初以木傳子攄終始

而可見洎虞夏商周茲煥炳蔥蒨秦失之於狼貪蠶食漢

綴之以蛇斷龍戰中莽茫夫何從聖蓄縮曾不眷謂在天神聖

伏惟道祖老子視生靈之磔裂醜害馬之蹄齧莊子去其害馬呵五

精之息肩考正氣之無轍協夫貽孫以降使之造命更摯

累聖昭洗中祚觸蹶指則天革唐為周事氣慘黷乎脂夜之妖勢廻

薄乎龍蛇之孽伏惟陛下勃然憤激之際天闕不敢旅拒

指玄宗平韋后之亂事鬼神為之嗚咽高衢騰塵長劍吼血尊卑配

宇縣刷插紫極之將頽拾清芬於已缺鑪以之仁義鍛以



之賢哲聯祖宗之耿光卷夷狄之影撇蓋九五之後人人

自以遭唐虞四十年來家家自以為稷卨同契王綱近古而

不軌見非路天聽貞觀以高揭蠢爾差僭粲然優劣宜其課

密於空積忽微此段言治曆之事刊定於興廢繼絕指求殷周漢為三恪事

而後觀數統從首始八音六律而惟新日起算外起一字

千金而不滅上曰吁昊天有成命惟五聖以受此敘主上謙讓歸功

于天地我其夙夜匪遑宴用素樸以守吁嗟乎麟鳳胡為

乎郊藪豈上帝之降鑒及茲玄元之垂裕於後夫聖以百

年為鶉鷲道以萬物為芻狗未段歸到憂聖危明欲主上去淫祀却貢獻以登大庭之

治今何以茫茫臨乎八極眇眇託乎羣后端策拂龜於周

漢之餘緩視闊步於魏晉之首斯上古成法蓋其人已朽

不足道也於是天子默然而徐思終將固之又固之意不

在抑殊方之貢亦不必廣無用之祠金馬碧雞非理人之

術應無用之祠珊瑚翡翠此一物何疑應殊方之貢言一物之微無所關涉奉郊

廟以為寶憎怵惕以孜孜況大庭氏之時況此六龍飛御

之歸

頌祇謂為歌頌以祭地祇○泰龜卜吉也○瓊邸王祀上帝則天官掌張壇案設皇邸封人掌王之社壇為畿

封而樹之司門官各小胥正樂懸之位○旌門設帷為宮則樹旌表門坡陀高貌殼騎張弓之騎軋軋難進也



軼凌越也○浴日初上之日如萍如萍實也太帝上九  
 星曰華蓋鉤陳羽林之星戎削裁制貌落羽始皇三徵  
 王次仲不至變為大鳥落翮於居庸山中○岐華二山  
 渭涇二水○翳蔽也彌終也溟滓淡微也○黝黝陰黑  
 也○堪天道輿地道詩如輕如軒中營天子營○緜縞  
 盛貌軼音代車轄也甘泉賦蠖略毳綏正言車馬之狀  
 人門王行無宮則立長大之人以為門行馬謂桂極木  
 柵也轆轤遠貌○歲蕤盛也建杓斗柄○紛純設席○  
 碎磔大聲○胙音圭腹大貌窟塊淡而聚也駟大聲若  
 小聲葩光彩晦陰漬沈也誕大也澗回旋也蕤滓紛擾  
 也駟駟行貌青女天神出以降霜江妃即舜二妃晝曖  
 不明也浚泚延長貌○叢棘獄中狴牢亦獄也○醜大  
 飲酒也上祀南郊賜醜三日釀合錢飲○莊子至人不  
 逆寡謂不侮弱也不雄成謂不恃成而處物先也○太  
 昊位在東方主春象日泊及也五行志心之不睿厥咎  
 霧有脂夜之妖若脂水夜汚人衣淫之象也皇之不建  
 厥咎眊有龍蛇之孽○擻擊也○課密言律曆以課疎  
 密空積若鄭氏分於為數千忽微謂若有若無細於髮

也○呂氏春秋易一字而千金○公詩五聖連龍袞袞  
 元即老子○莊子聖人鶉居而鷺食鳥行而無彰天地  
 以萬物為芻狗視之如芻草狗畜用過則棄之○按立  
 宗崇祀立元方士爭言符瑞又信崔昌之議欲比隆周  
 漢不知淫祀矯誣慙德多矣子美三賦之卒章皆寓規  
 于頌即子雲賦羽獵甘泉意也公曰賦料揚雄敵豈虛  
 語哉○陳子龍曰三大禮賦辭  
 氣壯偉非唐初餘子所能及

**原註**後村詩話云前人謂杜詩冠古今而無韻者不可  
 讀又謂太白律詩殊少此論施之小家數可也余

觀杜集無韻者惟夔府詩題數行頗艱澀容有誤字脫  
 簡如大禮三賦沉著痛快非鉤章棘句者所及太白七  
 言近體如鳳凰臺五言如憶賀監哭紀叟之作皆高妙  
 未嘗細考而輕為議論學者之通患韓退之嘗云氣水  
 也言浮物也水大則物之浮者小大畢浮氣之與言猶  
 是也氣盛則言之短長與聲之高下皆宜此論最親切  
 李杜是甚氣魄豈但  
 工于有韻及古體乎



進封西嶽賦表

原註年譜云天寶十三載公在京師進封西嶽賦按玄宗天寶九載正月

羣臣奏封華嶽從之二月辛亥西嶽廟災乃停封至是年冬公始進此賦而請封也

臣甫言臣本杜陵諸生年過四十經術淺陋進無補於明時退嘗困於衣食蓋長安一匹夫耳頃歲國家有事於郊廟幸得奏賦待制於集賢委學官試文章再降恩澤仍猥以臣名實相副送隸有司參列選序然臣之本分甘棄置永休望不及此豈意頭白之後竟以短篇隻字遂曾聞徹宸極一動人主是臣無負於少小多病貧窮好學者已典可在臣光榮雖死萬足至於仕進非敢望也日夜憂迫復

未知何以上答聖慈明臣子之效况臣常有肺氣之疾恐

忽復先草露塗糞土而所懷冥冥孤負皇恩敢攄竭憤懣

攄發洩也領略不則作封西嶽賦一首以勸所覲謂已所希望勸上行之

明主覽而留意焉先是御製嶽碑文卒章曰待余安人治

國然後徐思其事此蓋陛下之至謙也今茲人安是已今

茲國富是已况符瑞翕習福應交至何翠華之脈脈朱本作默

乎維嶽固陛下本命明皇生于仲秋以永嗣業維嶽授陛下元

弼克生司空謂郭子儀公傾慕正人如此朱云玄宗十

著故公及之斯又不可寢已伏維天子霈然留意焉春將披圖



視典冬乃展采錯事采事也日尚浩濶人匪勞止庶可試哉

微臣不任區區懇到之極謹詣延恩甄獻納奉表進賦以

聞臣甫誠惶誠恐頓首頓首謹言

封西嶽賦 并序

上既封泰山之後玄宗開元十三年十一月封泰山禪梁父三十年間車轍馬

跡至於太原遷于長安時或謁太廟祭南郊每歲孟冬巡

幸溫泉而已聖主以為王者之體告厥成功止於岱宗可

矣故不肯到崆峒訪具茨驅八駿於崑崙親射蛟於江水

始為天子之能事壯觀焉爾況行在供給蕭然煩費或至

作歌有慚於從官誅求坐殺於長吏說盡巡幸之害甚非主上執

玄祖老子醇醲之道端拱御蒼生之意大哉聖哲垂萬代則

蓋上古之君皆用此也然臣甫愚竊以古者疆場有常處

贊見有常儀則備乎玉帛而財不匱乏矣動乎車輿而人

不愁痛矣雖東岱五嶽之長以東嶽形太華足以勒崇垂鴻與山

石無極伊太華最為難上至於封禪之事獨軒轅氏得之

夫七十二君罕能兼之矣其餘或蹶踣風雲碑版祠廟終

么麼不足追數今聖主功格軒轅氏業纂七十君風雨所

及日月所照莫不砥礪華近甸也其可恧乎比歲鴻生巨



儒之徒誦古史引時義云國家土德與黃帝合主上本命  
 與金天合玄宗封華山神為金天王而守闕者謂上書人亦百數天子寢不  
 報蓋詳如也頃或詔厥郡國掃除曾巔雖翠蓋可薄乎蒼  
 穹而銀字未藏於金氣臣甫誠薄劣不勝區區吟咏之極  
 故作封西嶽賦以勸賦之義預述上將展禮焚柴者實覲  
 聖意因有感動焉為其詞曰

此序逼真漢人宜公每以相如枚乘自命○么麼小貌○宛委書金簡青玉為字編以白銀皆瑑其文

惟時孟冬百工乃休上將陟西嶽覽八荒御白帝之都少昊

白帝治西岳見金天之王既刊石乎岱宗又合符乎軒皇茲事

體大越不可載已學封禪書越遠也先是禮官草具其儀各有典

司俯叶吉日欽若神祇而千乘萬騎已螻略佻儼屈矯陸

離唯君所之然後拭翠鳳之駕開日月之旗撞鳴鐘發雷

輜辨格澤之修竿決河漢之淋漓曠天狼之威弧墜魍魎

之霏霏赤松前驅彭祖後馳方明夾轂昌寓侍衣山靈秉

鉞而踉蹌海若海神護蹕而參差風馭冉以縱變雲螭綏而

遲蛇地軸軋軋殷以下折原隰草草朱本作草本儼而東飛岐

梁二山閃倏涇渭反覆而天府載萬侯之玉尚方具左轟黃

屋已焜煌於山足矣乘輿尚鳴鸞輿儲精澹慮華蓋之大



角低回

皆旗幟

北斗之七星皆去届蒼山而信宿屯絕壁之

清曙既臻夫陰宮

宮名

犀象碑兀

鹵簿

戈鋌悉宰飄飄蕭蕭洵

洵如也於是太一

神之尊者

抱式玄真

冬神

司直天子迺宿祓齋

就登陟駢素虬超崩劣天語秘而不可知代欲聞而不可

得

代謂後代

柴燎上達神光充塞泥金乎茵苔之南

華山有蓮花峰

刻

石乎青冥之北上意由是茫然延降天老與之相識問太

微之所居稽上帝之遺則颯弭節以徘徊撫八紘而賦

黑忽風翻而景倒澹殊狀而異色罔若塞袪開帷下辯宸

極者

謂天若下鑿誠敬

久之雲氣蒼以迴復山嘯噪而未息

用武帝嵩

岳三呼萬歲事

祀事孔明有嚴有翼神保是格時萬時億爾乃駐

飛龍之秋秋

猶踰踰

詔王屬以中休觀羣后於高掌之下

華山

有巨靈掌巖

張大樂於洪河之洲芬樹羽林莽不可收千人舞

萬人謳騏驎踐踐而在郊鳳凰蔚跋而來遊雷公伐鼓而

渾汗地祇被震而悲愁樂師拊石而具發激越乎遐陬羣

山爲之相峽

峽謂相摩

萬穴爲之倒流又不可得載已久而景

移樂闋上悠然垂思曰嗟乎余昔歲封泰山禪梁父以爲

王者成功已纂終古嘗鑿前史至於周穆漢武豫遊寥闊

亦所不取惟此西嶽作鎮三輔非無意乎頃者猶恐百姓



不。足。人。所。疾。苦。未。暇。瘞。斯。玉。帛。考。乃。鐘。鼓。是。以。視。嶽。於。諸。侯。錫。神。以。茅。土。豈。唯。壯。設。險。於。甸。服。報。西。成。之。農。扈。亦。所。以。感。一。念。之。精。靈。答。應。時。之。風。雨。者。矣。今。茲。冢。宰。庶。尹。醇。儒。碩。生。僉。曰。黃。帝。顓。頊。乘。龍。遊。乎。四。海。發。軻。匝。乎。六。合。竹。帛。有。云。得。非。古。之。聖。君。而。泰。朱本華。最。為。難。上。故。封。禪。之。事。鬱。沒。罕。聞。以。余。在。位。發。祥。隕。祉。者。焉。可。勝。紀。而。不。得。已。遂。建。翠。華。之。旗。用。塞。雲。臺。之。議。矧。乎。殊。方。奔。走。萬。國。皆。至。玄。元。從。助。清。廟。祖獻。歛。也。臣。甫。舞。手。蹈。足。曰。大。哉。樂。乎。真。天。子。之。表。奉。天。為。子。者。已。不。然。何。數。千。萬。載。獨。繼。軒。轅。氏。

之美彼七十二君又疇能臻此蓋知明主聖罔不克正功

罔不克成放百靈歸華清宮名

亦典亦真文情兼至登封頌功中藏諷諫正義尤難子美真君子也。蠖略廣大也。怡儼舒徐也。屈矯壯健也。陸離文彩也。格澤星名黃白如炎火狀其見也不種而獲修竿其光綿亘也。列仙傳彭祖姓籛名鏗陸終氏仲子歷夏至殷末八百餘歲善導引行氣。縱雙高舉也。螭螭委折也。遲蛄動貌。崩劣音疾力高大峻險貌。天老以杜詩所引則謂三公也太微十星乃天子之宮庭。王屬謂百官杜詩用王命亦王所命官也。踐踐走貌。梁父泰山旁小山也。封者增高也。禪者廣厚也。增泰山以報天禪梁父以報地。少皞以九扈為九農正扈民無淫。黃帝封泰山禪亭亭顓頊封泰山禪云云亭亭云云二山也。隕降也。雲臺內禁地。

畫馬讚



韓幹畫馬毫端有神。驊騮老大。駉褭清新。魚目瘦腦。龍文長身。雪垂白肉。風蹙闌筋。逸態蕭疎。高驤縱恣。四蹄雷電。一日天地。御者閒敏。去何難易。愚夫乘騎。動必顛躓。瞻彼駿骨。實惟龍媒。漢詠燕市已矣。茫哉但見。駉駉紛然。往來良工。惆悵落筆。雄才。公自注穆天子傳飛免駉褭日馳三萬里

數行內豪逸之致無窮。驊騮駉褭魚目龍文四駿馬名。闌筋豎者千里馬謂目上痕如井字。

唐興縣客館記

原註年譜云。上元二年。公在成都作唐興縣客館記。按集中有簡王明府

詩鶴云。遂州唐興縣宰王潛也。公嘗為潛作唐興客館記。蓋公時在成都。遂州與成都俱屬劍南。唐興在天寶初。改為蓬溪。此因其舊名耳。

中興之四年。王潛為唐興宰。脩厥政事。始自鰥寡。惇獨而和其封內。非侮循循。不畏險膚。而行而一咨於官屬。於羣吏。于眾庶。曰。邑中之政。庶幾繕完矣。惟賓館上陋。下濕。吾人猶不堪其居。以容四方賓賓。其謂我何。改之重勞。我其謂人何。咸曰。誕事至濟。厥載則達。觀於大壯。作之閉閔。作之堂構。以永圖崇。高廣大踰。越傳舍通梁。直走崑。將墜壓素柱。上承安若泰山。兩傍序開發洩。雲露潛靚。滾矣步欄。復雷萬瓦。在後匪丹。牖為實疎。達為迴廊。南注又為覆廊。以容介行人。亦如正館。制度小劣。直左階而東。封殖脩竹。



茂樹挾右堦於南環廊又注亦可以行步風雨不易謀而集事邑無妨工亦無匱財人不待子來定不待方中矣宿息井樹或相為賓或與之毛天子之使至則曰邑有人焉

某無以栗階栗階義未詳豈階之為厲訛寫乎州長之使至則曰某非敢

賓也子無所用俎四方之使至則曰子貺某多矣敢辭贊

或曰明府君之侈也何以為人皆曰我公之為人也何以

侈子徒見賓館之近夫厚不知其私室之甚薄又轉一器物

未備力取諸私室人民不知賦斂乃至於館之醞醞闕出於私厨使之乘駟闕辦於私廡君豈為亭長乎是躬親也

若館宇不脩而觀臺榭是好賓至無所納其車我浩蕩無

所措手足公每好用我字代所述者語也獲高枕乎其誰不病吾人矣毗

瑕忽生何以為之是道也施舍不幾乎先覺矣杖之友朋

歎曰杖想謂友朋之老者扶杖而觀朱本作杜亦未妥美哉是館也成人不知人

不怒廨署之福也府君之德也府君曰古有之也非吾有

也余何能為是亦前州府君崔公之命也余何能為是日

辛丑歲秋分大餘二小餘二千一百八十八杜氏之老記

已本一作廨署之福也府君之德也府君之德也廨署之福也府君曰古有之也非吾有也余何能為是亦前州府君崔公之命也余何能為是日辛丑歲秋分大餘二小餘二千一百八十八杜氏之老記



以質見姿似拙似滯而有古致總不欲墮流利尖巧一家後人學此種筆力不佳往往有畫虎之弊○未大餘小餘即觀朱釋亦未明

雜述

杜子曰凡今之代用力為賢乎進賢為賢乎進賢賢乎則魯之張叔卿孔巢父二才士者聰明深察博辯閎大固必能伸於知己令聞不已任重致遠速於風飈也是何面目黧黑常不得飽飯喫曾未如富家奴茲敢望縞衣乘軒乎豈東之諸侯深拒於汝乎豈新令尹之人未汝之知也由天乎有命乎雖岑子薛子引知名之士月數十百填爾逆

旅請誦詩浮名耳勉之哉勉之哉夫古之君子知天下之不可蓋也故下之知衆人之不可先也故後之嗟乎叔卿遣辭工於猛健放蕩似不能安排者謂不能順序入化以我為聞人而已以我為益友而已叔卿靜而思之嗟乎巢父執雌守常吾無所贈若以泰山冥冥崑崙以高泗水潏潏瀾以清悠悠友生復何時會於王鎬之京載飲我濁酒載呼我為兄

意致俱不猶人○進叔卿以謙退規巢父以濶大公真益友

秋述

原註年譜云天寶十載公在京有秋述一首時霖雨積旬牆屋多壞西京尤甚



秋杜子臥病長安旅次多雨生魚青苔及榻常時車馬之  
 客舊雨來今雨不來昔襄陽龐德公至老不入州府而揚  
 子雲草玄寂寞多為後輩所襲近似之矣嗚呼冠冕之窟  
 名利卒雖朱門之塗泥士子不見其泥矧抱疾窮巷之  
 多泥乎以不分明寓子魏子獨踽踽然來汗漫其僕夫夫  
 又不假蓋夫夫本檀弓不見我病色適與我神會我棄物也四  
 十無位子不以官遇我知我處順故也子挺生者也無矜  
 色無邪氣必見用則風后力牧是已歎王季友用此文章則子游  
 子夏是已無邪氣故也得正始故也作人作文俱要無邪氣得正始噫所

不至於道者時或賦詩如曹劉談話及衛霍豈少年壯志  
 未息俊邁之機乎似貶寔讚曼倩語意子魏子今年以進士調選名  
 隸東天官告余將行既縫裳既聚糧東人怵惕筆札無敵  
 謙謙君子若不得已知祿仕此始吾黨惡乎無述而止

古拙曲折似西京以上文

說旱公自注初中丞嚴公節制劍南日奉此說○原註年譜云寶應元年公在成都上嚴武說旱時嚴武為成都尹節度劍南東西川

周禮司巫若國大旱則率巫而舞雩傳曰龍見而雩建己  
 之月蒼龍宿之體昏見東方萬物待雨盛大故祭天遠為



百穀祈膏雨也。今蜀自十月不雨，抵建卯，非雩之時，奈久旱，何得非獄吏只知禁繫，不知疎決，怨氣積，冤氣盛，亦能致旱。是何川澤之乾也，塵霧之塞也，行路皆菜色也，田家其愁痛也。自中丞下車之初，軍郡之政，罷弊之俗，已下手開濟矣。文中不宜用俗字然公詩文多通用不拘百事冗長者，又以革削矣。獨獄囚未聞處分，豈次第未到為獄無濫繫者乎？穀者百姓之本，百役是出，况冬麥黃枯，春種不入，公誠能暫輟諸務，親問囚徒，除合死者之外，下筆盡放，使囹圄一空，必甘雨大降，但怨氣消，則和氣應矣。躬自疏決，請以兩縣及府繫

為始，管內東西兩川各遣一使，兼委刺史縣令對巡使同疏決。如兩縣及府等囚例處分。詳明衆人之望也隨時之義也。昔貞觀中歲大旱，文皇帝親臨長安，萬年二赤縣決獄膏雨膏。一本作滂是足即岳鎮方面歲荒札，皆連帥大臣之務也。不可忽。凡今徵求無名數，又耆老合侍者。合侍想老人宜今子孫侍兩川侍丁得異常丁乎？不殊常丁賦斂，是老男老女死日短促也。國有養老公，遽遣吏存問其疾苦，亦和氣合應之義也。時雨可降之徵也。愚以為至仁之人，常以正道應物，天道奚近去人不遠。錢本作天道遠去人不遠



東西兩川說

朱云廣德二年嚴武幕中作

聞西山漢兵食糧者四千人皆關輔山東勁卒多經河隴  
 幽朔教習慣於戰守人人可用兼差堪戰子弟向二萬人  
 實足以備邊守險脫南蠻侵掠南詔烏蠻別種與吐蕃接後臣吐蕃印雅子  
 弟不能獨制但分漢勁卒助之不足撲滅是吐蕃馮陵本  
 自足支也。擢量西山印雅兵馬卒叛援形勝明矣。頃三城  
 失守陷於吐蕃罪在職司非兵之過也。糧不足故也。今此輩見  
 關兵馬使八州素歸心於其世襲刺史獨漢卒偏裨將主  
 之竊恐備吐蕃在羗漢兵小昵而釁隙隨之矣。况軍足姦

吏減剝未已哉。愚以速擇偏裨主之主之勢明其號令一  
 其刑賞申其哀恤致其驩忻宜先自羗子弟始自漢兒易  
 解人意而優勸旬月大浹洽矣。仍使兵羗各繫其部落刺  
 史分其黨而總以漢將真外馭妙用得自教閱都受統於兵馬使更不得  
 使八州都管在一羗王或都關一世襲刺史是羗之豪族  
此反難接然漢文往往有之發源有遠近世封有豪家紛然聚藩落之  
 議於中肆與奪之權於外已然則備守之根危矣。又何以  
 藉其為本式遏雪嶺之西哉。比羗族封王者初以拔城之  
 功得今城失矣。襲王如故總統未已。余諸董羗攘臂何羗想



人董王相

王尹之獄是矣

必有其事

由策嗣羗王關王氏舊親

西董族最高怨望之勢然矣誠於此時便宜聞上使各自

統領不須王區分易制然後都靜聽取別於兵馬使不益

元戎氣壯部落無語或朱本作哉縱一部落怨獲羣部喜矣

無爽如此處分豈惟邛南不足憂八州之人願賈勇復取

三城不日矣幸急擇公所素諳明於將者朱作明了正色

遣之獠賊內編屬自久數擾背亦自久徒惱人耳憂慮蓋

不至大乎昨聞受鐵券爵祿隨之今聞已小動為之奈何

若不先招諭也穀貴人愁春事又起緣邊耕種即發精卒

討之甚易恐賊星散於窮谷溪林節度兵馬但驚散緣邊

之人供給之外未見免劫掠從來邊兵之弊坐此公已道盡而還賃其地

豪族兼有其地而轉富蜀之士肥無耕之地流冗之輩近

者交互其鄉村而已遠者漂寓諸州縣而已實不離蜀也

大抵祗與兼并豪家力田耳但鈞畝薄斂則田不荒以此

上供王命下安疲人可矣豪族轉安是否非蜀仍禁豪族

受賃罷人田管內最大誅求宜約富家辦而貧家創夷已

深矣方欲安豪族又恐病貧家語意纏綿難即解今富兒非不緣子弟職掌盡

在節度衙府州縣官長手下哉村正雖見面不敢示文書



取索非不知其家處獨知貧兒家處兩川縣令刺史有權攝者須盡罷免苟得賢良不在正授權在進退聞上而已

洞中機宜之文即少陵之經濟可知誰云迂濶少實用  
○公意在諸羌分黨各屬而統以漢將其未歸於散兼  
并擇委任可謂馭邊之妙策文之紆古似斷似續酷肖  
西京○邛雅二州屬劍南道○末二句言不在正授權  
攝只在行事守法  
奉上得真賢良

孫 丙謙 丙厚 正字

讀書堂杜工部文集註解卷之一

讀書堂杜工部文集註解卷之二

椰璟子字

滢陽張 潛上若評註 男 榕端樸園校訂

橋恒子久

乾元元年華州試進士策問五首 原註年譜云公時為華州司功參軍

問山林藪澤之地各以肥磽多少為差故供甲兵士徒之役府庫賜與之用給郊廟宗社之祀奉養祿食之出辨乎名物存乎有司是謂公賦知歸地著不撓者已今聖朝紹宣王中興之洪業於上庶尹備山甫補袞之能事於下而



東寇猶小梗率土未甚闕總彼賦稅之獲盡贍軍旅之用

供兵爲害  
今古如一

是官御之舊典關矣人神之攸序乖矣欲使軍

旅足食則賦稅未能充備矣欲將誅求不時則黎元轉罹  
於疾苦矣子等以待問之實知新之明觀志氣之所存於  
應對乎何有佇渴救敝之通術願聞強學之所措意蓋在  
此矣得游說乎

問國有輅車廬有飲食古之按風俗遺使臣在王宮之一  
守得馳傳而分命蓋地有要害郊有遠近供給之比省費  
相懸今茲華惟襟帶關逼輦轂行人受辭於朝夕使者相

望於道路屬年歲無蓄積之虞職司有愁痛之歎况軍書  
未絕王命急宣插羽先翥於騰鷹敝帷不供於埋馬豈芻  
粟之勤獨爾實駢駢之價闕如人主之軫念屢及於茲邦  
伯之分憂何嘗敢怠乞思難再近日已降水衡之錢積骨  
頗多無暇更入燕王之市欲使輶軒有喜主客合宜閭閻  
罷杼軸之嗟官吏得從容之計側佇新語當聞濟時

問通道陂澤隨山濬川經啓之理疏奠之術抑有可觀其  
來尚矣初聖人盡力溝洫有國作爲隄防洎後代控引淮  
海漕通涇渭因舟楫之利達倉庾之儲又賴此而殷亦行



之自久。近者有司相土決彼支渠。既潰渭而亂河。竟功多而事寢。人實勞止。岸乃善崩。遂使委輸之勤。中道而棄。今軍用蓋寡。國儲未贍。雖遠方之粟大來。而助挽之車不給。是以國朝仗彼天使。徵茲水工。議下淇園之竹。

漢築河下淇園之竹

以為

更鑿商顏之井。

穿渠引洛水至商顏下岸善崩乃鑿井井下相通行水

又恐煩

費居多。績用莫立。空荷成雲之鋪。復擁填淤之泥。若然則舟車之用。大小相妨矣。軍國之食。轉致或闕矣。矧夫人煙尚稀。牛力不足者。已子等飽隨時之要。挺賓主之資。副乎求賢敷厥讜議。

問足食足兵。先哲雅誥。蓋有兵無食。是謂棄之。致能掉鞅。

靡旌。

掉正也。靡旌驅疾也。用楚許伯致師事。

斯可用矣。况寇猶作。梗兵不可

去。日聞將軍之令。親覩司馬之法。關中之卒未息。灞上之營何遠。近者鄭南訓練。城下屯集。贍彼三千之徒。有異什一。而稅竊見明發。教以戰鬪。亭午放其庸保。課乃菽麥。以為尋常。夫悅以使人。是能用古。伊歲則云暮。實慮休止。未卜及瓜之還。交比翳桑之餓。

用靈輒事

羣有司自救不暇。二三子謂之何哉。

變格

問昔唐堯之為君也。則天之。大敬授人時。十六升自唐侯。



者已昔帝舜之為臣也舉禹之功克平水土三十登為天子者已本之以文思聰明加之以勞身焦思既睦九族協和萬邦黜去四凶舉十六相故五帝之後傳載唐虞之美無得而稱焉易曰君子終日乾乾詩曰文王小心翼翼竊觀古人聖哲未有不以君唱於上臣和於下致乎人和年豐成乎無為而理者也主上躬純孝之聖樹非常之功內則拳拳然事親如有闕外則悻悻然求賢如不及伊百姓不知帝力庶官但此下恐遺一字恭已如何加之庶官恭已而已寇孽未平咎徵之至數也倉廩未實物理之固然也今大軍虎步列

國鶴立山東之諸將雲合淇上之捷書日至二三子議論引正詞氣高雅則遺稜盪滌之後聖朝砥礪之辰雖遭明主必致之於堯舜降及元輔必要之於稷高驅蒼生於仁壽之域反淳朴於羲皇之上自古哲主立極大臣為體眇然坦途利往何順子有說否庶復見子之志豈徒瑣瑣射策趨競一第哉頃之問此謂舊時策對孝廉取備尋常之對多忽經濟之體考諸詞學自有文章在束以徵事曷成凡例焉今愚之粗徵貴切時務而已以下兼及鼓鑄積穀夫時患錢輕以至於量資幣權子母鑄錢量資幣權輕重重幣母也輕幣子也代復改鑄或行乎



前榆莢

漢錢

後契刀

王莽錢

當此之際，百姓蒙利厚薄，何人所

制輕重

問何人所制為善，輕重猶言優劣也。

又穀者所以阜俗康時，聚人守

位者也。下至十室之邑，必有千鍾之藏，苟凶穰以之，貴賤

失度，雖封丞相而猶困。

田千秋為丞相，封富民侯。

侯大農而為何

桑弘羊為

治農都尉領大農

是以繼絕表微，無或區分踰越，蒙實不敏，仁遠

乎哉

蒙用吳下阿蒙事

奉謝口救放三司推問狀

原註年譜云：至德二載夏，公至鳳翔，上謁肅宗，拜左

拾遺會房琯以陳濤戰敗罷相，公與琯為布衣交。上疏救琯，帝怒，詔三司推問宰相張鎬、揅之，帝解就令

鎬宜口救宜放推問故有謝狀

右臣甫智識淺昧，向所論事，涉近激訐，違忤聖旨，既下有

司具已舉劾，甘從自棄，就戮為幸。

語質而古

今日已時，中書侍

郎平章事張鎬奉宣口救，宜放推問，知臣愚戇，舍臣萬死，

曲成恩造，再賜骸骨。臣甫誠頑，誠蔽死罪，死罪。臣以陷身

賊庭，憤惋成疾，實從間道，獲謁龍顏，猾逆未除，愁痛難過。

猥廁袞職，願少裨補，竊見房琯以宰相子，少自樹立，晚為

醇儒，有大臣體，時論許琯必位至公輔，康濟元元，陛下果

委以樞密，眾望甚允。觀琯之深念，主憂義形於色，況畫一

保太素所蓄積者已，而琯性失於簡酷，嗜鼓琴，董庭蘭今



之琴工

庭蘭善沈聲祝聲蓋大小胡笳云

遊瑄門下有日貧病之老依倚

為非瑄之愛惜人情一至於玷汚臣不自度量歎其功名

未垂而志氣挫衄覲望陛下棄細錄大所以冒死稱述何

思慮始竟闕於再三陛下貸以仁慈憐其懇到不書狂狷

之過復解網羅之急是古之淡容直臣勸勉來者之意天

下幸甚天下幸甚豈小臣獨蒙全軀就列待罪而已無任

先懼後喜之至謹詣閣門進狀奉謝以聞謹進

至德二載六月一日宣義郎行在左拾遺臣杜甫狀奏

救瑄是公生平一大節。朱云甫與房瑄為布衣交瑄以容董延蘭罷宰相甫上疏言罪細不宜免大臣帝怒

詔三司推問宰相張鎬救之得解。唐書韋陟除御史大夫會杜甫論房瑄詞意迂慢帝令陟與崔光遠顏真

卿按之陟奏甫言雖狂不失諫臣體帝由是疎之觀此則論救者不獨一張鎬矣。錢云朱長文琴史云董延

蘭隴西人唐史謂其為房瑄所昵數通賕謝為有司劾治而房公由此罷去子美亦云庭蘭游瑄門下貧病之

老依倚為非而薛易簡稱庭蘭不事王侯散髮林壑者六十載貌古心遠意閑態和撫絃韻聲可以感鬼神矣

天寶中給事中房瑄好古君子也庭蘭聞義而來不遠千里余因此說亦可以觀房公之過而知其仁矣當房

公為給事中也庭蘭已出其門後為相豈能遽棄哉又賕謝之事吾疑諧瑄者為之而庭蘭老朽豈能辨釋遂

被惡名耳房公貶廣漢庭蘭詣之無愠色唐人有詩云七條絃上五音寒此樂求知自古難惟有開元房太尉

始終留得董庭蘭按薛易簡以琴待詔翰林在天寶中子美同時人也其言必信伯原琴史千載而下為庭蘭

雪此惡名白其厚誣不獨正唐史之謬兼可補子美之闕矣



為遺補薦岑參狀

宣義郎試大理評事攝監察御史賜緋魚袋岑參右臣等竊見岑參識度清遠議論雅正佳名早上時輩所仰今諫諍之路大開獻替之官未備恭惟近侍實藉茂材臣等謹詣閣門奉狀陳薦以聞伏聽進止

至德二載六月十二日左拾遺內供奉臣裴薦等狀

右拾遺內供奉臣孟昌浩

右拾遺內供奉臣魏齊聃

左拾遺內供奉臣杜甫

左補闕臣韋少游

為華州郭使君進滅殘寇形勢圖狀

原註年譜云乾元元年夏公出

為華州司功七月有為華州郭使君作進滅殘寇形勢圖

右臣竊以逆束身檻中奔走無路尚假餘息蟻聚苟活之

日久謂安慶緒敗走鄴郡蔡希德等分道進勦軍聲復振陛下猶覲其匍匐相率降

歛盡至廣務寬大之本用明惡殺之德故大軍雲合蔚然

未進上以稽王師有征無戰之義下以成古先聖哲之用

心茲事玄遠非愚臣所測臣聞易載隨時不俟終日先王

之用刑也抑亦小者肆諸市朝大者陳諸原野今殘孽雖



窮感日甚。自救不暇。尚慮其逆帥望秋高馬肥之便。蓄突圍拒轍之謀。大軍不可空勤轉輸之粟。諸將宜窮犄角之進。頃者河北初收。數州思明降表。繼至實為平盧兵馬在賊左脅。賊動靜之利制不由已。則降附可知。今大軍盡離河北。逆黨意必寬縱。若萬一軼略河縣。草竊秋成。臣伏請平盧兵馬及許叔冀青登節度使等軍鄆州西北。渡河先衝收魏。或近軍志避實擊。虛之義也。伏惟陛下圖之。遣李銑淮節度殷仲卿青州刺史孫青漢等軍。遷迤渡河。佐之收其貝博賊之精銳。撮在相魏衛之州。賊用仰魏而給。賊若抽其銳卒。

渡河救魏。博臣則請朔方郭子儀伊西北庭李嗣業等軍。渡泗水收相衛。賊若迴戈距我。兩軍臣又請郭口祁縣等軍。驀嵐馳屯。據林慮縣界。候其形勢漸進。又遣季廣琛鄭蔡節度吳淮西節度等軍。進渡河收黎陽臨河等縣。相與出入犄角。逐便撲滅。則慶緒之晉可翹足待之而已。是亦恭行天罰。豈在王師必無戰哉。愚臣聞見淺狹。承乏待罪。未精慎固之守。輕議擒縱之術。抑臣之夢寐。貴有裨補。謹進前件圖如狀。伏聽進止。乾元元年七月日某官臣狀進。

遣帥分兵犄角互進。算無遺策。誰謂公不長於經濟。平盧在幽燕之東。故曰左脅。鄆州隋東平郡縣屬河。



南道魏州漢魏郡元城縣地屬河北道時為安所據○貝州隋清河郡博州隋武陽郡之聊城縣相州漢魏郡衛州隋汲郡俱屬河北道○沁水在澤州嵐州即嵐城縣屬河東道林慮屬相州黎陽屬衛州臨河屬相州

為閬州王使君進論巴蜀安危表

原註年譜云廣德元年公在閬州按

集中有王閬州筵及陪王使君晦日泛江諸詩

臣某言伏自陛下平山東收燕薊洎海隅萬里百姓感動喜王業再造瘡痍蘇息陛下明聖社稷之靈以至於此然河南河北貢賦未入江淮轉輸異于曩時唯獨劍南自用兵以來稅歛則殷部領不絕瓊林諸庫仰給是多是蜀之土地膏腴物產繁富足以供王命也近者賊臣惡子頻有

亂常巴蜀之人橫被煩費猶自勸勉充備百役不敢怨嗟

吐蕃今下松維等州成都已不安矣楊琳師再脅普合

並日合

二州俱屬劍南道顓顓兩川不得相救百姓騷動未知所裁況臣

本州山南所管初置節度庶事草創豈暇力及東西兩川矣伏願陛下聽政之餘料巴蜀之理亂審救援之得失定兩川之異同問分管之可否度長計大速以親賢出鎮哀罷人以安反仄犬戎侵軼羣盜窺伺庶可遏矣而三蜀大府也徵取萬計陛下忍坐見其狼狽哉不即為之臣竊恐蠻夷得恣屠割耳實為陛下有所痛惜必以親王委之節



鉞與房瑄所建正同此古之維城盤石之義明矣陛下何疑哉在

選擇親賢加以醇厚明哲之老為之師傅則萬無覆敗之跡又何疑焉其次付重臣舊德智略經久舉事允愜不隕穫於蒼黃之際臨危制變之明者觀其樹勲庸於當時扶泥塗於已墜整頓禮體竭露臣節必見方面小康也今梁州既置節度與成都足以久遠相應矣東川更分管數州於內幕府取給按東川與山南接壤山南既增節度東川兵馬便可并付西川減省幕府繁費破弊滋甚若兵馬悉付西川梁州益坦坦字似訛為聲援是重歛之下免出多門西南之人有活望矣必以戰伐未息勢資

多軍應須遣朝廷任使舊人授之使節留後之寄綿歷歲

時非所以塞眾望也言留後無益臣于所守封界連接梓州正

可為成都東鄙其中別作法度亦不足成要害哉徒擾人矣伏惟明王裁之勅天下徵收赦文減省軍用外諸色雜賦名目伏願損之又損之劍南諸州亦因而復振矣將相之任內外交遷西川分壺以仗賢俊愚臣特望以親王總戎者意在根固流長國家萬代之利也敢輕易而言次請慎擇重臣亦願任使舊人鎮撫不缺借如犬戎俶擾臣素知之臣之兄承訓自沒蕃以來長望生還偽親信于贊普



探其深意者報復摩彌名國青海之役決矣同謀誓衆於前後沒落之徒曲成翻動陰合應接積有歲時每漢使回蕃使至帛書隱語累嘗懇論臣皆封進上聞屢達臣兄承訓憂國家緣邊之急願亦勤矣況臣本隨兄在蜀向二十年兄既辱身變夷相見無日臣比未忍離蜀者望兄消息時通所以戮力邊隅累踐班秩補拙之分淺待罪之日淡蜀之安危敢竭聞見臣子之義貴有所盡於君親愚臣迂闊之說萬一少裨聖慮遠人之福也愚臣之幸也昨竊聞諸道路云吐蕃已來草竊岐隴逼近咸陽似是之間憂憤隕迫益增尸祿寄重之懼寤寐報効之懇謹冒死具巴蜀成敗形勢奉表以聞

為夔府柏都督謝上表

原註年譜云大曆元年公至夔州時柏中丞為夔州都督

公嘗為作謝上表按集中有陪柏中丞觀宴將士等詩

臣某言伏奉月日制授臣某官祇拜休命內顧殞越策駑馬之力冒累踐之寵自數勲力萬無一稱再三怵惕流汗至踵謹以其月日到任上訖臣某誠戰誠懼頓首頓首死罪死罪伏以陛下君父任使之久掩臣子不逮之過就其小效復分深憂察臣劍南區區恐失臣節如彼加臣頻煩



階級鎮守要衝如此。勉勵疲鈍，伏揚陛下之聖德。愛惜陛下之百姓，先之以簡易，間之以樂業，均之以賦歛，終之以敦勸。然後畢禁將士之暴，弘治主客之宜，示以刑典，難犯之科，寬以困窮，計無所出。哀今之人，庶古之道。語樸而義盡，表體正

難此古茂內救俾獨，外攘師寇。上報君父，曲蓋庸拙之分。下循臣子，勤補失墜之日。灰粉骸骨，以備守官。伏惟恩慈，胡忍容易。愚臣之願也。明主之望也。限以所領，未遑謁對。無任兢灼之極。謹遣某官奉表陳謝，以聞。臣誠喜誠懼，死罪死罪。

前殿中侍御史柳公紫微仙閣畫太一天尊圖文

石鼈老放神乎始青之天，遊目乎浩劫之家。泠泠然馭乎風，熙熙然登乎臺。進而俯乎寒林，退而極乎延閣。閣名見龍

虎日月之君，亘于疎梁。塞于高壁，骨者鬣者，皆者黝者。視遇之間，若巖寇敵者。已伊四司五帝天之徒，青節旗也崇然綠輿，駢然仙宮。洎鬼官無央即無窮，數眾陽者近陰者遠，俱浮空不定，目所向如一。蓋知北闕帝君老君之尊，端拱侍衛之內，于天上最貴矣。已而左玄之屬吏，三洞弟子某天師弟子進曰：經始績事，前柱下史河東柳涉，職是樹善，損于而家。



憂于而國剝私室之賈渴蒸人之安志所至也請梗槩帝

君救護之慈朝拜之功曰若人存謂老子思我主籙我字作老子語

氣公往往如此用生之根死之門我則制伏妖之興毒之騰凡今

之人反側未濟柳氏柱史也立乎老君之後獲隱嘿乎忍

塗炭乎先生即石鰲老與道而遊與學而遊可上以昭太一之

威神于下下以昭柱史之告訴于上玉京之用事也率土

之發祥也惡乎寢而庸詎仰而先生石鰲老藐然若往頽然

而止曰噫夫鳥亂于雲魚亂于水是畢弋鉤罟削格之智

生是機變邀退攫拾之智極故自黃帝已下干戈崢嶸流

血不乾骨蔽乎原乖氣橫放淳風不返雖書載蠻夷率服

詩稱徐方大來許其慕中夏與夫容成氏中央氏尊盧氏

輩結繩而已百姓至死不相往來茲茂德困矣此段言上古朴野之

治不可法矧賢主趣之而不及庸主聞之而不曉浩穰崩蹙數

千古哉至使世之仁者蒿目而憂世之患有是夫今聖主

誅干紀康大業物尚疵癘戰爭未息言歸于正必揆當世之變

日慎一日衆之所惡與之惡衆之所善與之善勅有司寬

政去禁問疾薄斂修其土田險其走集以此馭賊臣惡子

自然百祥攻百異有漸天下洵洵何其撓哉已登乎種種



之民舍夫啍啍之意是巍巍乎北闕帝君者肯不乘道腴  
卷黑簿詔北斗削死南斗注生與夫圓首方足施及乎蠢  
蠕之蟲肖翹之物盡驅之更始何病乎不得如昔在太宗  
之時哉石鼈老畢辭三洞弟子某又某靜如得動如失久  
而却走不敢貳問

能暢老氏之學每於生處拙處見致此亦少陵所獨。道家之源出于老子上處玉京為神王之宗下在紫微為飛仙之主。石鼈谷在萬年縣三天有清微天其氣始青浩劫謂累代也。削格所以設羅網者。啍啍謂朴野黑簿罪簿也。

祭遠祖當陽君文

原註年譜云開元二十九年公在河南祭遠祖于洛之首陽按晉鎮

南將軍當陽侯杜預字元凱乃公之十三世祖也

維開元二十九年歲次辛巳月日十三葉孫甫謹以寒食  
之奠敢昭告于先祖晉駙馬都尉鎮南大將軍當陽成侯  
謚曰之靈初陶唐出自伊祁聖人之後世食舊德降及武  
庫應乎虬精恭聞淵淡罕得窺測勇功是立智名克彰縉  
甲江陵禋清東吳建侯于荆邦于南土河水活活造舟為  
梁洪濤奔汜未始騰毒春秋主解橐隸躬親嗚呼筆跡流  
宕何人蒼蒼孤墳獨出高頂靜思骨肉悲憤心胃峻極于  
天神有所降不毛之地儉乃孔昭取象邢山全模祭仲多



藏之誠焯序前文小子築室首陽之下不敢忘本不敢違  
仁庶刻豐石樹此大道論次昭穆載揚顯號于以采藝于  
彼中園誰其尸之有齊列孫齊作齋用三百篇成句嗚呼敢告茲辰  
以永薄祭尚饗

樸而雅。杜預在內損益萬機朝野美之號杜武庫。預醉臥嘔吐人窺于戶見一大蛇垂頭而吐是日虬精。造舟為梁言預以孟津渡時恐有水患請建河橋于富平津橋成帝臨舉觴屬預曰非君此橋不立也。預耽思牘籍為春秋左氏經傳集解。杜預筆跡不知流宕後世何人收之故曰流宕何人。全模祭仲密縣有鄭祭仲墓預臨卒遺令後人域兆取法于鄭大夫欲以儉自完棺器小歛之事皆當稱此。

祭外祖祖母文

維年月日外孫滎陽鄭宏之京兆杜甫謹以寒食庶羞之  
奠敢昭告于外王父母之靈嗚呼外氏當房祭祀無主伯  
道何罪元陽誰撫緬惟夙昔追思艱窶當太后秉柄內宗  
如縷紀國則夫人之門舒國則府君之外父聿以生居貴  
戚釁結狂豎公外家當天后時父母以讒害下獄而雌伏  
單棲雄鳴折羽憂心惓惓獨行踽踽悲夫逝景分飛忽間  
于鳳凰咄彼讒人有詞異于鸚鵡初我父王之遭禍我母  
妃之下室謂下請室深狴殊塗酷吏同律夫人于是布裙屣屨  
提餉潛出昊天不傭退藏于宓久成凋瘵溘至終畢蓋乃



事存于義陽之誅名播于燕公之筆嗚呼哀哉宏之等從  
 母昆弟兩家因依弱歲俱苦茲顏永違豈無世親不如所  
 愛豈無舅氏不知所歸誓以偏往測戀光輝漸漬相勗居  
 諸造微即式微意幸遇聖主願發清機以顯內外何當奮飛洛  
 城之北邙山之曲列樹風煙寒泉珠玉千秋古道王孫去  
 兮不歸三月清天春草萋兮增綠頃物將牽累事未遂欲  
 使淚流頓盡血下相續者矣捧奠遲迴炯心依屬庶多載  
 之灑掃循茲辰之軌躅

此等古茂之章今人亦不能讀○鄧伯道無兒○元陽當作陽元少孤為外氏所養○紀國舊書紀王慎太宗

第十子趙王貞敗慎亦下獄卒慎次子沂州刺史義陽  
 王琮等五人垂拱中竝遇害中興初追復官爵張燕公  
 作義陽王碑曰初永昌之難王下河南獄妃錄司農寺  
 惟有崔氏女扉屢布衣往來供饋徒行頽色傷動人倫  
 中外咨嗟目為勤孝按碑則公之外母紀王之孫義陽  
 之女也故曰紀國則夫人之門又曰名播于燕公之筆  
 也公母崔氏此為明徵范陽太君誌稱冢婦盧氏其為  
 傳寫之誤無疑矣燕公碑文又述義陽二子長曰行遠  
 以冠就戮次曰行芳以童當捨芳啼號抱行遠乞代兄  
 命既不見聽固求同盡西南傷之稱為死悌季子行保  
 泣血上請迎喪歸葬○舒國舒王為高祖第十八子永  
 昌年與子亶俱為田神勣所陷繫獄死後贈司徒曰府  
 君之外父者蓋舒國  
 為府君外王父也

祭故相國清河房公文

原註年譜云廣德元年公在閬州有祭故相國房公文按

唐史房瑄字次律玄宗幸蜀拜為相肅宗即位靈武瑄請自將平賊戰于陳濤斜敗績遂罷相守邠州繼



歷晉漢二州刺史廣德元年召拜刑部尚書道病卒贈太尉又按公集中有承聞房公靈輿自閬州啓殯歸葬東都詩鶴云按舊史房公以廣德元年八月四日卒于閬州僧舍而權瘞于彼時公在閬州春祭文明年春晚有別房公墓詩又明年為永泰元年房公啓殯時公在雲安故有承聞房公歸葬東都之作

維唐廣德元年歲次癸卯九月辛丑朔二十二日壬戌京兆杜甫敬以醴酒茶藕尊鯽之奠奉祭故相國清河房公之靈曰嗚呼純朴既散聖人又歿苟非大賢孰奉天秩唐始受命羣公間出君臣和同德教充溢魏杜行之夫何畫一婁宋繼之不墜故實百餘年間見有輔弼及公入相紀綱已失將帥干紀烟塵犯闕王風寢頓神器圯裂關輔蕭

條乘輿播越太子卽位揖讓蒼卒小臣用權尊貴倏忽

謂李輔國也公實匡救忘餐奮發累抗直詞空聞泣血

次律心事已明用意甚妙時遭稔沴國有征伐車駕還京朝廷就列盜

本乘弊誅終不滅高義沉埋赤心蕩折貶官厭路

當路讒口到骨謂肅宗入賀蘭進明之譖致君之誠在困彌切謂貶瑄以厭足天道

濶遠元精茫昧偶生賢達不必濟會明明我公可去時代

言不可去時代也賈誼慟哭雖多顛沛仲尼旅人自有遺愛二聖

崩日二聖立宗肅宗長號荒外後事所委不在臥內言未得為肅宗託孤因

循寢疾憔悴無悔死矢泉塗激揚風槩天柱既折安仰翊



戴地維則絕安放夾載豈無羣彥我心忉忉不見君子逝

水滔滔惜慕之極泄涕塞谷吞聲賊壕有車爰送有紼爰操撫

墳日落脫劍秋高我公戒子培子孺無作爾勞斂以素帛

付諸蓬蒿身瘞萬里家無一毫數子哀過他人鬱陶水漿

不入日月其恫州府救喪一二而已人情如此自古所嘆罕聞

知己曩者書札望公再起今來札數為態至此先帝松柏

故鄉枌梓靈之忠孝氣則依倚拾遺補闕視君所履公初

罷印人實切齒甫也備位此官蓋薄劣耳見時危急敢愛

生死點明救君何不聞君謂刑欲加矣伏奏無成終身愧

恥乾坤慘慘豺虎紛紛蒼生破碎諸將功勲城邑自守聲

鼓相聞山東雖定灞上多軍憂恨展轉傷痛氤氳豈正

色白亦不分謂不分黑白數語培塿滿地崑崙無羣致祭

者酒陳情者文何當旅襯得出江雲嗚呼哀哉尚饗

時舍時露用意婉至此少陵第一首文蓋人遇知己其

情既篤其文自佳。房次律建分王帝胄之議為祿山

所畏公深推慕復以救瑄左遷乃生平最大之事故此

文亦生平最得意之文。細看此文方知錢註杜於房

杜相交及杜以諫貶幽憤諸詩之確。讀蒼生諸將八

字則知錢註洗兵馬及謂杜每不滿於肅宗偏愛靈武

諸臣之論甚確。唐詩紀事司空圖謂子美祭房

太尉文大白佛寺碑贊宏拔清厲乃其歌詩也

唐故萬年縣君京兆杜氏墓誌原註年譜云天寶九年公在河南誌萬年

杜文注卷二



縣君京兆杜氏墓按縣君公之姑也又按公范陽不君墓誌云縣君適河東裴榮期榮期嘗為濟王府錄事

甫以世之錄行跡示將來者多矣大抵家人賄賂詞客阿

諛真偽百端波瀾一揆說盡後世石誌之弊夫載筆光苾於金石作

程通達於神明立德不孤揚名歸實可以發皇后則標格

女史竊見於萬年縣君得之矣其先系統於伊祁分姓於

唐杜在虞為陶唐氏在周為唐杜氏吾祖也我知之遠自周室迄於聖代

傳之以仁義禮智信列之以公侯伯子男春秋傳云穆叔

謂之世祿其在茲乎曾祖某失名隋河內郡司功獲嘉縣令

王父某名依藝皇朝監察御史洛州華縣令前朝咸以士林

取貴宰邑成名考某名審言脩文館學士尚書膳部員外郎

天下之人謂之才子兄升國史有傳縉紳之士誅為孝童

以其報父仇也見祖母盧氏誌中故美玉多出於崑山明珠必傳於滄海

蓋縣君受中和之氣成肅雍之德其來尚矣作配君子實

惟好仇河東裴君諱榮期見任濟王府錄事參軍入在清

通同行領袖素髮相敬朱紱有光縣君既早習於家風以

陰教為己任執婦道而純一與禮法而始終可得聞也昔

舅歿姑老承順顏色侍歷年之寢疾力不暇於須臾苟便



於人皆在於手淚積而形骸奪氣憂淡而巾櫛生塵謂不暇盥

也尊卑之道然固出自於天性孝養哀送各流稱仰允所

謂能循法度則可以承先祖供給祭祀矣維其矜莊門戶

節制差服裁制親疎之禮功成則運有若四時物或猶乖匪踰終

日誌婦道着此奧語黼畫組就之事割烹煎和之宜規矩數及於

親姻脫落頗盈於歲序不拘拘校量若其先人後已上下敦睦

懸磬知歸窮揖讓惟久在嫂叔則有謝氏光小郎之才於

娣姒則有鍾琰洽介婦之德周給不礙於親疎泛愛無擇

於良賤至如星霜伏臘軒騎歸寧慈母每謂於飛來幼童

方生乎感悅加以詩書潤業道誘為心遏悔吝於未萌驗

是非於往事內則致諸子於無過之地外則使他人見賢

而思齊爰自十載已還默契一乘之理絕葷血於禪味混

出處於度門喻筏之文字不遺開卷而音義皆達毋儀用

事家相遵行矣至於膳食滑甘之美鞞結縫線之難展轉

忽微欲叅謀而縣解指麾補合猶取則於垂成此亦人所不能形容

其積行累功不為薰脩所住著有如此者謂其不溺於佛教也靈山

鎮地長吐煙雲德水連天自浮星象則其著心定惠豈近

於揚摧者哉言非關獎飾越天寶元年某月八日終於東京仁



風里春秋若干示諸生滅相越六月二十九日遷殯於河  
南縣平樂鄉之原禮也嗚呼哀哉琴瑟罷聲蘋蘩晦色骨  
肉號兮天地感中外痛兮鬼神惻有子長曰朝列次朝英  
北海郡壽光尉次朝牧女長適獨孤氏次聞氏皆稟自胎  
教成於妙年厥初寢疾也惟長女在列英牧或以遊以宦  
莫獲同曾氏之元申號而不哭傷斷鄰里悠哉少女未始  
聞哀又足酸鼻嗚呼縣君有語曰可以褐衣斂吾起塔而  
葬起塔從佛教也裴公自以從大夫之後成縣君之榮愛禮實淡  
遺意蓋闕但褐衣在斂而幽隧爰封其所歆飾咸遵儉素

謂裴公以禮葬之不遵起塔

眷茲邑號未降天書各有司存成之不日

嗚呼哀哉有兄子曰甫制服於斯紀德於斯刻石於斯或  
曰豈孝童之猶子歟奚孝義之勤若此甫泣而對曰非敢  
當是也亦爲報也甫昔臥病於我諸姑意公之母早亾而育於姑也姑  
之子又病問女巫巫曰處楹之東南隅者吉此段尤敘得明切入情  
姑遂易子之地以安我我自用存而姑之子卒後乃知之  
於走使甫嘗有說於人客將出涕感者久之相與定謚曰  
義君子以爲魯義姑者遇暴客於郊抱其所攜棄其所抱  
以割私愛縣君有焉是以舉茲一隅昭彼百行銘而不韻



蓋情至無文得其詞曰嗚呼有唐義姑京兆杜氏之墓

誰能敘閨中事入如許淡致語少陵之文本自過人反以詩揜○語藻而氣質閒處敘事尤真古人一飯之德不忘杜陵有焉其人足法也○嫂叔二句王凝之妻謝道韞每值叔獻之與客談理詞屈輒以步障自蔽代獻之論客不能屈王渾妻鍾琰雖貴門與弟妹郝氏相親○佛家惟有一乘法無二無之○度門佛有八萬四千諸度法門○莊子以有繫者為縣則無繫者縣解也○廡陳輿服於庭也○齊攻魯至郊見婦人棄子抱姪遂回軍曰婦人猶持節行况朝廷乎

唐故范陽太君盧氏墓誌

原註年譜云天寶三載五月五日公之祖母范陽太

君盧氏卒於陳留之私第按公之祖審言前娶薛氏再娶盧氏以八月旬有一日歸葬河南鄆師公作墓誌

五代祖柔隋吏部尚書容城侯大父元懿是渭南尉父元哲是廬州慎縣丞維天寶三載五月五日故脩文館學士著作郎京兆杜府君諱某之繼室范陽縣太君盧氏卒於陳留郡之私第春秋六十有九嗚呼以其載八月旬有一日發引歸葬於河南之偃師以是月三十日庚申將入著作之大塋在縣首陽之東原我太君用甲之穴禮也墳南去大道百二十步奇三尺北去首陽山二里凡塗車芻靈設熬置銘之名物加庶人一等蓋遵儉素之遺意塋內西北去府君墓二十四步則壬甲可知矣遺奠之祭畢一二



家相進曰斯至止將欲啓府君之墓門安靈櫬於其右豈

厥飾未具時不練歟言皆具且練故作詰問前夫人薛氏之合葬也

豈盧太君先合葬前夫人耶初太君令之諸子受之流俗難之太君易

之今茲順壬取甲又遺意焉嗚呼孝哉孤子登號如嬰兒

視無人色且左右僕妾洎廝役之賤皆蓬首灰心嗚呼流

涕寧或一哀所感片善不忘而已哉實惟太君積德以常

臨下以怒如地之厚縱天之和運陰教之名數秉女儀之

標格嗚呼得非太公之後必齊之姜乎姜氏封於盧以薛國爲氏出范陽

氏所生子適曰某名故朝儀大夫兗州司馬次曰升升唐書作

并幼卒報復父讐國史有傳次曰專歷開封尉先是不祿

息女長適鉅鹿魏上瑜蜀縣丞次適河東裴榮期濟王府

祿事次適范陽盧正均平陽郡司倉叅軍嗚呼三家之女

又皆前卒而某等夙遭內艱有長自太君之首者首與手杜集每

通至於婚姻之禮則盡是太君主之慈恩穆如人或不知

者咸以爲盧氏之腹生也然則某等亦不無平津孝謹之

名於當世矣漢公孫弘養後母孝謹後爲丞相封平津侯登卽太君所生前任

武康尉二女曰適京兆王佑任硤石尉曰適會稽賀撫卒

常熟主簿其往也旣哭成位有若冢婦同郡盧氏朱云當作清河



崔介婦榮陽鄭氏鉅鹿魏氏京兆王氏女通諸孫子謂所生女

通男孫三十人內宗外宗寢以疎濶者或互纁玉帛自他

日互有所至若以為杜氏之葬近於禮而可觀而家人亦

不敢謂不敢當知禮名以時繼年式志之金石銘曰

太君之子朝議所尊貴因長子澤就私門毫邑之都終天

之地享年不永歿而猶視

潔質不支。升復父仇審言貶授吉州司戶參軍與州僚不協司馬周季重與員外司戶郭若訥共構審言罪狀繫獄將因事殺之既而季重等府中酣讌審言子并年十三懷刃以擊之季重中傷死而并亦為左右所殺季重臨死曰我不知審言有孝子郭若訥誤我至此審言因此免官士人咸哀并孝烈蘇頌為墓誌劉允濟為

祭文。錢曰此誌代其父開作也薛氏所生子曰開曰專太君所生子曰登誌曰某等夙遭內艱有長自太君之手者知其代父作也又曰并幼卒專先是不祿則開尚無恙也元誌云開為奉天令是時尚為兗州司馬開之卒蓋在天寶間而其年不可考矣公母崔氏此云冢婦盧氏盧字訛以祭外祖父母文及張燕公義陽王碑考之為崔甚明而作年譜者曲為之說曰先生之母微故歿而不書或又大書於世系曰母盧氏生母崔氏其敢為誕妄如此

唐故德儀 贈淑妃皇甫氏神道碑

原註年譜云天寶四載公

在齊州作開元皇帝皇甫淑妃墓碑碑云淑妃生鄂王瑤臨晉公主公主下嫁榮陽鄭潛曜妃薨後歲陽載紀潛曜下教邑司爰度碑版又按鄭有園亭在河南新安縣公集中有鄭駙馬宴洞中及重題東亭詩又有鄭駙馬池臺遇鄭廣文同飲詩



后妃之制古矣而軒轅氏帝嚳氏次妃之跡最有可稱存乎舊史然則其義隱其文略周禮王者內職大備而陰教宣詩人關雎風化之始樂得淑女蓋所以教本古訓發皇婦道居具燕寢之義動有環珮之節進賢才以輔佐君子不淫色以取媚閨房雖彤管之地功過必紀而金屋之寵流宕一揆言寵妃靜正者少稽女史之華實嗣嬪則之清高亦時有其人偉夫精選淑妃諱某姓皇甫氏其先安定人也惟高即契字封商於赫有光伊湯祖樹德謂於今不忘必宋之子莫之與比伊清風繼代惠此餘美夫其係緒蕃衍級冕

所興列為公侯古有皇甫充石則其宗可知也夫其體元消息經術之美刊正帝圖中有晉皇彛晏先生甫謚則其家可知矣嗟乎我有奕葉公作文好承權輿矣我有徽猷展肅雍矣積羣玉之氣自對白虹之天生五色之毛不離丹鳳之穴曾祖烜皇朝宋州刺史祖粹皇朝越州刺史都督諸軍事父日休皇朝左監門衛副率妃則副率府君之元女也粵在襁褓體如冰雪氣象受于天和詩禮傳乎胎教故列我開元宗神武之嬪御者豈易其容止法度哉今上宗昔在青宮之日詔誥錢本作誥良家女擇視可否充備淑哲太



妃以內秉純一外資沈靜明珠在蚌水月鮮白美玉處石

崖津潤澤結禱而金印相輝同輦而翠旗交影由是恩加

婉順品列德儀德儀內官正二品雖掖庭三千爵秩十四掩六宮

以取俊超羣女以見賢豈渥澤之不流曾是不敢以露才

揚已卑以自牧而已夫如是言足以厚人倫化風俗彌縫

坤載之失夾輔元亨之求坤元亨利牝馬之貞嗚呼彼蒼也常與善

何有初也不久好此處疑有脫誤奈何況妃亦既遭疾怙如慮往

上以之服事最舊佳人難得送藥必經于御手見寢始廻

于天步月氏使者空說返魂之香漢帝夫人終痛歸來之

像以開元二十三年歲次乙亥十月癸未朔薨於東京某

宮院春秋四十有二嗚呼哀哉望景向夕澄華微陰風驚

碧樹霧重青岑天子悼履綦之蕪絕惜脂粉之凝冷下麟

鳳之銀牀到梧桐之金井嗚呼哀哉厥初權殯于崇政里

之公宅後詔以某月二十七日己酉卜葬於河南縣龍門

之西北原禮也制曰故德儀皇甫氏贊道中壺肅事後庭

孰云疾疢奄見凋落永言懿範用愴于懷宜登四妃之列

式旌六行之美可冊贈淑妃喪須竝官供言喪事所須並宜官供河

南尹李適之充使監護非夫清門華胄積行累功序於王



者之有始有卒介於嬪御之不僭不濫是何存榮歿哀視有遇之多也謂遇恩獨多有子曰鄂王諱瑤兼太子太保使持

節幽州大都督事有故在疾而卒豈無樂國今也則亾匪

降自天云何吁矣有女曰臨晉公主出降代國長公主子

榮陽潛曜官曰光祿卿爵曰駙馬都尉昔王儉以公主恩

尚帝女為榮儉母齊武康公主何宴兼關內侯何宴進孫長於宮省尚金鄉公主得

封列侯是亦晉朝歸美公主禮承於訓孝自於心霜露之感

形於顏色享祀之數缺于灑掃嘗戚然謂左右曰自我之

西歲陽載紀彼都之外道理遐絕聖慈有蓬萊之深異縣

有松檟之阻思欲輕舉安得黃鵠未議巡豫徒瞻白雲望

關塞之風烟尋常涕泗懷伊川之陵谷恐懼遷移于是下

教邑司爰度碑版以鄭駙馬相託此段自不可少甫忝鄭莊之賓客遊寶

主之園林又及巴身以白頭之嵇阮豈獨步於崔蔡而野老何

知斯文見託公子泛愛公子謂潛曜壯心未已不論官闕游夏

入文學之科兼敘哀傷顏謝有后妃之誄銘曰

積氣之清積陰之靈漢曲迴月高堂麗星驚濤洶洶過雨

冥冥洗滌蒼翠誕生娉婷一婉彼柔惠迥然開爽綢繆

之故昔在明兩恩渥未渝康哉大往展如之媛孰與爭長



二 珩珮是加。翬瑜克備。先德後色。累功居位。壺儀孔修。

宮教咸遂。王子獎飾。子朱作於未是禮亦尊異。三 小苑春深。離

宮夜逼。花間度月。同輦未歸。池畔臨風。焚香不息。嗚呼變

化。惠好終極。四 馮相視視。太史書氛。藏舟晦色。逝水寒

文。翠幄成彩。金爐罷燠。燕趙一馬。瀟湘片雲。五 恍惚餘

跡。蒼茫具美。王子國除。匪他之恥。言非其罪 公主愁思。永懷於

彼。日居月諸。丘壠荆杞。六 巖巖禹鑿。瀾瀾伊川。列樹拱

矣。豐碑缺然。爰謀述作。歛就雕鏤。金石照地。蛟龍下天。七

蛟龍當謂碑前所刻龍

少室東立。繚垣西走。佛寺在前。宮橋在後。

維山有麓。與碑不朽。維水有源。與詞永久。八 銘體次第秩然

莊重周悉。雖有駢辭。無傷於體。漢誌銘多用對句。正復相同。未記鄭駙馬以碑見託。有精彩。古人作一文。必著

來歷。則其不輕見諾可知矣。○怙音帖。安也。如慮往謂百慮俱去。○漢月支國王進返魂香。○漢齊人少翁致

李夫人魂。○六行婦德。○按鄂王瑤母皇甫德儀。○宗在臨淄。邸以容色見顧。及惠妃承恩。鄂王之母漸疎。薄

○楊洞奏太子瑛與鄂王構異。謀尋賜死。○臨晉公主。中代國長公主寢疾。潛曜侍左右。累三月不饋。面尚臨

至。癸為歲之陽。妃以開元二年己亥薨。至天寶四載。已酉為歲。陽載紀矣。碑當以是年作也。然此釋終未甚明

○寶主漢館陶公主號寶太主。○崔蔡崔駙蔡邕。○顏延之謝莊。皆有后妃哀誄。

原註 東坡餘論云。董君新序稱子美為皇甫淑妃碑在開元三十二年。最少作也。予按此碑乃駙馬鄭潛



曜託子美作而非開元二十三年淑妃葬時作也碑云甫忝鄭莊之賓客遊竇主之園林以白頭之嵇阮豈獨步於崔蔡野老何知斯文見託其敘稱白頭野老安得謂之少作又銘云日居月諸丘壠荆杞列樹拱矣豐碑缺然則立碑蓋在葬後也董君不攷立碑之年但據葬年而云故誤耳

曾孫

元塏

正字

元坦

讀書堂杜工部文集註解卷之二終



